

المشروع القومي لتوثيق التراث المسرحي
من مكتبة الفنان علي الكسار

رواية
الانتخابات
١٩٢٣م

١٣
عشر

الانتخابات
١٩٢٢م





د. مصطفى الفقي
رئيس مجلس الإدارة

م. محمد فاروق
مدير المركز

م. ياسمين ماهر عبد النور
إشراف عام
نائب مدير المركز لشئون التراث

م. معتز حسين
مدير المشروع

هبة السيد خضير
مسئول توثيق التراث المسرحي

جيهان أبو بكر
إدخال البيانات

هشام إحسان
تصميم الغلاف

هايدي محمود رفعت
هانبا علي سالم
مشاركة في أعمال التوثيق

مصطفى النادي
مسح ضوئي

مروى يونس
إخراج فني وتنسيق

د. طارق حواس
رئيس فريق عمل التصميم المطبوع

شكر خاص لكل من:
الأستاذ ماجد علي الكسار الذي أمد المركز بمكتبة الفنان علي الكسار المسرحية.
كريستين ميشيل وباسم العجيزي لمشاركتهما في أعمال رقمنة ومراجعة
الروايات خلال فترة عملهما بالمركز.

المشروع القومي
لتوثيق التراث المسرحي
من مكتبة الفنان علي الكسار

الانتخابات
١٩٢٣م



مكتبة الإسكندرية بيانات الفهرسة - أثناء - النشر (فان)

الانتخابات، ١٩٢٣ م. - الجيزة، مصر : مكتبة الإسكندرية، مركز توثيق التراث الحضاري والطبيعي، ٢٠٢٠.

صفحة ٤ سم. (المشروع القومي لتوثيق التراث المسرحي. من مكتبة الفنان علي الكسار؛ ١٣)

تمك 978-977-452-312-9

١. المسرحيات العربية. ٢. الكسار، علي، ١٨٨٧-١٩٥٧. أ. مركز توثيق التراث الحضاري والطبيعي (مصر) ب. العنوان. ج. السلسلة.

2015758604

ديوي -892.725

ISBN 978-977-452-312-9

رقم الإيداع: 2015/4424

© مكتبة الإسكندرية، ٢٠٢٠.

الاستغلال التجاري

يحظر إنتاج نسخ متعددة من المواد الواردة في هذا الكتاب، كله أو جزء منه، بغرض التوزيع أو الاستغلال التجاري، إلا بموجب إذن كتابي من مكتبة الإسكندرية. وللحصول على إذن لإعادة إنتاج المواد الواردة في هذا الكتاب، يرجى الاتصال بمكتبة الإسكندرية، ص. ب. ١٣٨، الشاطبي ٢١٥٢٦، الإسكندرية، مصر.

البريد الإلكتروني: secretariat@bibalex.org

طُبِعَ في مصر

المحتويات

٧	تقديم.....
٩	الرائد الموهوب.....
١١	علي الكسار .. نبذة عن مسيرته الفنية.....
١٣	عن الرواية.....
١٥	شخصيات الرواية حسب ظهورها.....
١٩	الفصل الأول.....
٤٣	الفصل الثاني.....
٦٣	الفصل الثالث.....
أ	ملحق المدونات الموسيقية الأصلية.....



تقديم

إن تراثنا الثقافي والحضاري هو أعز ما نملك، فهو يمثل ذاكرة مصر ووجدانها؛ لذا يُعَدُّ الحفاظ عليه وتوثيقه ونشره واجبًا وطنيًا وقوميًا في المقام الأول. ولتحقيق الهدف من إبقاء التراث الثقافي بشقيه المادي وغير المادي حيًا بين المجتمعات المعاصرة لا بد أن يرتبط هذا التراث بواقع هذه المجتمعات ويمس وجدانها. وأن يوثق ويعاد تقديمه باستمرار؛ لكي تتناقله الأجيال المتعاقبة ويحدث الأثر المطلوب منه. وهو تحقيق التواصل بين الماضي والحاضر؛ لنصل بذلك إلى أهم أسس صناعة الحضارات الكبيرة.

ومكتبة الإسكندرية - وهي حلقة وصل بين الماضي والحاضر والمستقبل - تحرص على الاهتمام بالتراث الانساني وتوثيقه وفي القلب منه التراث المصري. الذي يضطلع به أحد مراكزها البحثية وهو مركز توثيق التراث الحضاري والطبيعي. وذلك من خلال برامج عمل تسعى لجمع وحصر وتوثيق العديد من أفرع التراث الثقافي المصري. والعمل الذي بين أيدينا الآن أحد إصدارات برنامج توثيق التراث المسرحي. والذي يتوخى من خلاله توثيق الأعمال المسرحية لأحد أهم رواد المسرح المصري وهو الفنان الكبير علي الكسار؛ حتى يُتاح للقارئ والباحث المتخصص التعرف على الحياة الثقافية والاجتماعية والسياسية لمصر في تلك الفترة المهمة من تاريخها.



وما كان لهذا العمل أن يرى النور لولا التعاون الجاد بين مكتبة الإسكندرية والأستاذ ماجد علي الكسار نجل الفنان علي الكسار، والذي أثمر إلى جانب هذه المطبوعات توثيقاً رقمياً للإنتاج الضخم من الأعمال المسرحية للفنان علي الكسار، التي يرجع تاريخها إلى الفترة من العشرينيات وحتى الأربعينيات من القرن الماضي، وذلك للحفاظ عليها من الاندثار.

وقد حرص أعضاء فريق العمل على وضع النص الأصلي دون أي تغيير أو تعديل للتعرف على المصطلحات المنتشرة في تلك الفترة، وكذلك الحالة الإبداعية لمؤلفي هذه الفترة الزمنية، بالإضافة إلى التعديلات المدخلة عليه والواضحة في هوامش النص المسرحي.

ويبقى أن نشير إلى أن هذه السلسلة يمثل خروجها دعوة لكل باحث ومهتم بحفظ التراث المسرحي وتسجيله وتحليله لمزيد من الجهد لاستكمال المسيرة. ونأمل أن تمثل خطوة في الحفاظ على تراثنا الحضاري، وعلى نقل معارفه ومهاراته التقليدية والإبداعية إلى أجيال المستقبل.

د. مصطفى الفقي

مدير مكتبة الإسكندرية



الرائد الموهوب

يمثل الفنان الكبير علي الكسار «١٨٨٧-١٩٥٧» علامة بارزة في تاريخ المسرح المصري الحديث، فعبر نصف قرن من العمل الجاد، منذ تأسيس فرقته المسرحية الأولى «دار التمثيل الزينبي» ١٩٠٧، أسهم الرجل في الحركة المسرحية، ثم جمع بين المسرح والسينما، وكان تنافسه الشرس مع نجيب الريحاني، في عشرينيات وثلاثينيات القرن العشرين، أداة مهمة في إنعاش المسرح ورواجه.

إذا كان الريحاني قد ابتكر شخصية كشكش بك، العمدة الريفي الساذج الذي يقع ضحية سهلة لناهبيه وسارقي أمواله، فإن علي الكسار يقترن بشخصية عثمان عبدالباسط، النوبي الطيب العفوي البريء كطفل.

كان علي الكسار رائدًا بحق في ساحة المسرح الأرجالي الذي لا يتقيد بالنص المكتوب، ويتواصل مع جمهور الصالة في إطار خلاب من العفوية والتقارب الحميم، لكن مشكلة الرائد الموهوب تتمثل في غياب القدرة على الخروج من الإطار الذي لا بد أنه يضيق ويعجز عن مواكبة متغيرات العصر وتطوره. وقد انتقل الكسار بشخصيته المسرحية إلى السينما، فقدم أفلامًا ناجحة جماهيريًا بقدر ما أنها لا تملك مؤهلات البقاء والاستمرار.



لينتهي الحال بإغلاق مسرحه بالقاهرة بعد أن قدّم ما يزيد عن ١٦٠ عرضاً مسرحياً. بالإضافة إلى العديد من الأفلام الناجحة. ويُسدل ستار حياته في مستشفى القصر العيني عن عمر يناهز الـ٦٩ عاماً بعد معاناة من الفقر والمرض.

وختاماً فإن المشروع الذي يتبناه «مركز توثيق التراث الحضاري والطبيعي» جدير بالاحترام والتقدير والاهتمام. ذلك أنه يتيح للقارئ والباحث فرصة معرفة صفحات بالغة الأهمية في تاريخ الفن المصري. ومن خلالها تطل شهادة صادقة عن المجتمع. سياسياً واقتصادياً وثقافياً. في صعوده وهبوطه وازدهاره وانكساره.

مصطفى بيومي
ناقد وروائي مسرحي



علي الكسار .. نبذة عن مسيرته الفنية

(٧) ١٥٨

حضرة محمد لغزة مدير إدارة التسجيل الثقافي
 بعد البحث - وعين مخابرتكم الذي يطلبه مني فيه ذكره في هذا الملف من سنة ١٩٨٧
 في أواخر سنة ١٩٨٧ ذكر لكم من قبله من سنة ١٩٨٧ على كمال كرمه من قبله السيد الربيع
 في ذكره والتاريخ:

كونت أول مرة تميلد من سنة ١٩٨٧ وعلمت بل الاسم كازينو من يري
 (سنتا ستوديو) حاليا وقد فاضلكم كثيرا من الروايات الثقافية في العالمين
 من: محمد ابراهيم - سيادة باريس - أجازة التيسير - المرة السنة - وغيرها
 من الوثائق التي ذكرها

ثم انتقلت الاسم ما جرت به اليد من لا خصصا ومن يؤمنه من يعرف
 الاسم المذكور فيه سنة ١٩٨٩ وقد فاضلكم من سنة ١٩٨٩ هذا
 المائة سنة من روايات أول (الثقافة من ١٤) وأخرها (سنتا ستوديو) ولم
 بالوجه في الروايات السابقة من قبل وقد فاضلكم من (عربية إيمان) في
 (عربية ستوديو) وقد فاضلكم من الماركة في سنة ١٩٩٠ من قبله من يعرف
 بالمشاكل من بينكم من الكرم من السنة وقد فاضلكم من سنة ١٩٩٠ من قبله
 ما استتمه من التقدير ولذا لم تستطع في التقدير

وهي أشر من كل من حصل منها من سنة ١٩٩٠ من قبله من يعرف
 من الكرم (سنتا ستوديو) ولا صراحة في سنة ١٩٩٠ من قبله من يعرف
 من سنة ١٩٩٠ من قبله من يعرف من سنة ١٩٩٠ من قبله من يعرف =

الاسم أعلاه - الفصحى - أبو بكر

وكنا دائما في كل عام نقوم برحلة إلى البرصية العين والبرصية
 من سنة ١٩٩٠ من قبله من يعرف من سنة ١٩٩٠ من قبله من يعرف
 من سنة ١٩٩٠ من قبله من يعرف من سنة ١٩٩٠ من قبله من يعرف
 من سنة ١٩٩٠ من قبله من يعرف من سنة ١٩٩٠ من قبله من يعرف
 من سنة ١٩٩٠ من قبله من يعرف من سنة ١٩٩٠ من قبله من يعرف



١٢٧٧ لقد قدت له سبها ومع حديته المزيك فوجدته مؤجرا الى فرد اجنيه
 فاستأجرت مع لسبع ملكه وحملت به ستون مائه وجرى في ١٢٧٧ والهجرت به
 ورايت : كما ديا كما - حبه سابع - خله ابن - فنة فنة جيرة فنة فنة فنة
 ثم تمت بجلسته الى الوجهه العليل والجرى استقرت شهر مايو ١٢٧٧ وبعين
 روضه المذبح يسوع فزينة للاسه : المنة ١٥ فله الا ١٢٧٧ وكذا قدتم
 كل يوم روايته وراياتنا بسودة

فذا من امة النساء لخص رأيا النساء السيناك فان ملكه فنة
 نيم : نيم في الطال - احكام لعرب - وردسا - الهية ولد يقن فذاف
 ١٢٧٧

والمملك سكتة نيم - صاحبة العاهه ورايتهم وكلمه على الله
 واما اذا سكتة من عند المذبح ابن فله فني ذكته فاذكر لكم :
 بواب العاهه - حينه - غفيرة المدركه - اللقران - فله وكي
 ٧ - لفتن ٢ حينه - ريم الفنة - فله المنة - الفنة اليا
 والمصه حرام - فزا الديو والتماره الكوكبه - صاحبة في لقب - وعيها ...
 ولرايت حديته لرفع الذواضن به طارة ابنته عند بعض باسرا لمراله اسهر
 الموضع الستوي ولكنه

ومنه في انتظار المرسوم الصينه هذا العام وعلى الله الزالك
 والسلام عليكم ورحمة الله وبركاته ؟ على الكار
 ١٢٧٨ فبراير ١٢٧٨



عن الرواية

قدمتها فرقة علي الكسار
مؤلف الرواية أمين أفندي صدقي
ألحان الرواية سيد درويش
عدد الفصول ٣
تاريخ العرض ١٩٢٣/٨/٢٦م

تم تنسيق المدونات الموسيقية كما وجدت بملف الرواية.

ملاحظات:

- يوجد ٧ صفحات مفقودة من النص الأصلي للرواية^[١].
- عرضت في نفس عام صدور دستور ١٩٢٣ الذي منح البلاد حق الانتخاب وتكوين الأحزاب وهي تتناول تطاحن الأحزاب وعدم تمثيل الشعب في البرلمان داعية إلى تطهير النوايا ومراعاة مصلحة البلاد^[٢].
- توفى سيد درويش قبل أن يتم تلحين باقي أجزال هذه المسرحية التي كتبها أمين صدقي وقام الفنان إبراهيم فوزي بإتمام ألحانها. وعرضت الرواية في ١٩٢٣/٩/٢٧م بعد وفاة سيد درويش بأثنى عشر يومًا^[٣].

[١] أنظر الصفحات: ٢٣، ٢٧، ٤١، ٧٨.

[٢] ماجد الكسار، علي الكسار في زمن عماد الدين، مهرجان القراءة للجميع، مكتبة الأسرة، سلسلة الأعمال الخاصة (م.د): الهيئة المصرية العامة للكتاب، ٢٠٠٣: ٩٣، ١٦١.

[٣] إيزيس فتح الله، وحسن درويش، ومحمود كامل، معدون، سيد درويش، مج: ٢، موسوعة أعلام الموسيقى العربية ٣ (القاهرة: دار الشروق: مكتبة الإسكندرية، مركز توثيق التراث الحضاري والطبيعي، ٢٠٠٣): ٣١١، ٧١٢.



شخصيات الرواية

حسب ظهورها

سكرتير رجب بيه	محرم
جماعة من الناخبين	الافندي، الفلاح، جعلص، أم أحمد، دقدق، ابو قراعة
والدة عزيزة	الحما
زوجة رجب بيه	عزيزة
مرشح في الانتخابات	رجب بيه
خادمة الحما	فريدة
عمدة برما غربية	أبو حويجة
زوجة شوال بيه	زبيدة
صاحب لوكاندة الملوك	صفر افندي
شريك صفر افندي	الخواجه حجاراكييس
جماعة من الناخبين	عويس، شلتوت، الرخم وهريدي
مرشح في الانتخابات	شوال بيه
يفتش شقة شوال بيه	باشجويش نمرة ١
يأتون مع باشجويش نمرة ١	باشجويش نمرة ٢ و ٣





علي الكسار

الفصل الأول

يرفع الستار عن خليط من الناخبين جالسين وإلى اليسار طاولة معدة للخطابه وعليها أوراق.

اللحن الافتتاحي

هس ما حدش منكم يتفلسف
أشغالها الامركوني
وخطتنا نابوليوني
قل له دكان الزلباني
ونقرر كده عالمياني
وموسم الانتخابات
وبتعمل عنها مازادات
تعمل لهم تعريفه
والذمه دي موش نضيفه
احسن سكرتير البيه اهه
ابلفوه وحيوه وطاطوا له
فين البيه الرئيس
نفضل نقول له بيس
بس ابقوا سقفوا له
بالقوي وقولوا له
من غير مواجهه ومن غير كذب
آدي نني اهه
آدي نني اهه
شرحاه اهه
أف نني دم
ها أنا ذا

هس ما حدش منكم يتنفس
لحسن دي جلسه همايوني
سياستنا هنا بسمه كاوي
اللي يقول لك كافي وماني
شغلنا كله كشري في كشري
اهه دا وقت الطلبات
ياما ناس بتبيع اصواتها
حق الحكومة تراقبهم
ما دام ضميرهم كوتشو
هس انك تهم بقی
ما دام بتتاع بلف
يا مرحبتين يا بيه
نتلف حواليه
دلوقت يجي حالاً
في كل كلمه اهتفوا له
ليحيا رئيسنا رئيس الحزب
كعبور افندي سلامه
سالم علي ابولييله
الاسطى سيد جعلص
دقدق فهمي العتره
الشيوخ قراعاه

هس

(ضحك)

وياللا نخش في دور الجد

بزيادة يا جماعه



اللي أساسه حقاني موش ممكن ينهد
طهروا النوايا حتى النهايه
مصلحة بلادنا يا مصريين فوق كل مصلحة
فوق كل غايه
فوق الدنيا وفوق الدين

- محرم : (وراء الطاولة بعد اللحن) أنا اشكركم يا اخواني. بالأصالة عن نفسي وبالنيابة عن رئيسنا رجب بيه فهمي الى احنا مجتمعين هنا علشان نرشحه للعضوية في البرلمان
- الافندي : فليحيا رجب بيه
- محرم : أشكركم أولًا لكونكم لبيتتم الدعوه بتاعة النهارده دي. وثانيًا لكونكم مهتمين بانتخاب رجب بيه رئيس الحزب بتاعنا اللي يسموه هنا في البلد حزب المقاييسين
- الجميع : ليحيا رجال الحزب بتاعنا
- محرم : عظيم. دلوقت اسمحوا اقول لكم بصفتي السكرتير الخصوصي لرجب بيه
- الافندي : (واقفًا) لا. أنا عايز اقول كلمه واحده يا حضرة السكرتير
- محرم : طيب طول بالك
- الافندي : لا لا بس كلمة واحدة حرقاني
- محرم : وبعدين بقى.. اتفضل يا سيدي. إذا كانت حازقك الخطابه تعالي اقف هنا مطرحي وقول الى إنت عايزه
- الافندي : لا لا موش ضروري. خليني هنا مطرح ما أنا
- محرم : لا دي أصول مايصحش
- الجميع : (في نفس واحد) إطلع اخطب. إطلع اخطب
- محرم : هس (يشير إلى الافندي فيذهب لطاولة الخطابه)
- الافندي : (باضطراب) أيها الساده
- الجميع : نعم
- الافندي : اسمحوا لي قبل كل شيء إني اقول لكم.. إني هنا قدامكم دلوقت.. في موقف.. في موقف حرج جدًا (يكج) يعني اعذروني يا اخواني لأني موش متعود إني اخطب ..
- الفلاح : (واقفًا مقاطعًا) تخطب إيه وتتجاوز إيه. إحنا دافعين فلوس علشان نسمع خطبة واحد دهل زي ده
- الافندي : هس اخرس مش شغلك



- محرم : هس من فضلك إنت. إنت هنا متفرج. ما تنحشرش في الممثلين. طول بالك شويه
 الفلاح : طولت. اللهم طولك يا روح (يجلس)
 الافندي : أيها الساده
 الفلاح : برضه..
 الافندي : يا اخواني فهموا حضرة الأخ ده
 الفلاح : لا أنا موش أخ
 الافندي : فهموه إن الخطابه دي موش. موش هين أبدًا. كذلك أرجوكم أيها الساده. إنكم
 ماتواخذونيش إذا غلطت... لأن موقفي ده أيها الساده..
 الفلاح : (واقفًا) هم كام ساده ياهو. دا خلانا ستويوتيري خالص
 الجميع : (معًا) غيره غيره غيره
 محرم : هس (ضاحكًا للافندي) إنت تسمعشي مني يا حضرة. الاحسن تروح تقعد
 مطرح ما كنت وبلاش خطابه
 الافندي : ليه. أنا قاصر عن الكلام يا حضرة السكرتير. أنا لازم ابدى رأيي هنا بكل حريه
 الجميع : إطلع بره. إطلع بره. إطلع بره
 محرم : هس من فضلكم يا جماعه. أرجوكم بلاش شوشره احنا موش في كتاب (يجلس
 الافندي مطيبيًا خاطره)
 الفلاح : (واقفًا) إوعى كده أنا راخر حزقاني خطبه
 محرم : (للفلاح) إيه يا سيدنا إيه. عايز تقول حاجه حضرتك
 الفلاح : أنا سيد من يقول
 الجميع : يطلع يخطب. يطلع يخطب. يطلع يخطب (يشير إليه السكرتير فيذهب لطاولة
 الخطابة)
 الفلاح : (يكح) بقى صلوا بنا عالنبى يا جدع إنت وهو وزيدوا النبي صلا. وخير الكلام
 ما قل ودل
 الجميع : عال عال
 الفلاح : بقى إنتم هنا دلوقت يا اخواني. موش لازم تدوا اصواتكم إلا إن كنتم أولًا..
 مدعين (مدعين) متغدين (متغدين) متعشين (متعشين) متهين (متهين)
 متكفين (متكفين)
 محرم : هي هي هي هي هي
 الفلاح : لا ما تواخذنيش يا افندي بس خدتني جلاله الخطابه



- محرم** : أما شيء كويس خالص. من فضلك ابقى اخطب من غير ما تتطور
- الفلاح** : على عيني (للجميع) بقى إنتوا القصد من اجتماعكم هنا دلوقت يا جماعه إنكوا تكونوا كده لكميه واحده. وتطلبوا من حضرة سعادة الحكومة إنها تعمل لنا برلمان فيه من كل جنس وكل فرمه
- الجميع** : وضح وضح وضح
- الفلاح** : أيوه. يعني تعمل لنا في البرلمان ده. مجلس شيوخ ومجلس افنديه ومجلس خواجات. لاجل ما يبقى برلمان سكالنس
- الجميع** : إنزل إنزل إنزل
- محرم** : هس (للفلاح) يا جدع بلاش هلوسه خليك في الموضوع
- الفلاح** : عجيبه امال أنا فين
- محرم** : إحنا هنا بنتكلم عن واحد مرشح وبس
- الفلاح** : مرشح. مرشح يعني إيه. فلتر (يضحك الجميع)
- محرم** : بس يا جماعه. أما نشوف قصده يقول إيه
- الفلاح** : قصدي اقول. إن من حيث ليس إن فيه هنا دلوقت في الخط ده حزين اتنين بيناطحوا بعض. اللى هم حزب المقايسين والحزب دكهه. اللى هو حزب المتليسين. قولوا معايا حزينا الله ونعم الوكيل
- الجميع** : برافو برافو برافو. أعد أعد (يصفقون)
- محرم** : (يخبط بالقلم على الطاولة) هس. دلوقت اسمحوا لي بقى يا جماعه إني الفت نظرکم لنقطه مهمه. وهي إن الاجتماع بتاع النهارده ده ربما يكون آخر اجتماع يحضره رئيسنا رجب بيه. لأنه يمكن يسافر بكره لجهات تانيه مرشح فيها للانتخاب
- الجميع** : كويس خالص
- محرم** : فبالاختصار دلوقت. هل كلکم مستعدين تمضوا لى هنا على انتخابه
- الجميع** : أيوه يا افندم
- محرم** : أورايت. دلوقت إذا كان بعضكم له مطالب ويحب عرضها على رجب بيه. علشان يبقى يحطها في البروجرام بتاعه. يتفضل يقول. أهه. المجال مفتوح
- جعلص** : (واقفًا) يا حضرة السكرتير. أنا نفسي اخطب ولو مره واحده بس
- محرم** : إيه. نفسك تخطب يا أوسطى جعلص. طيب اتفضل شرف. ما دمت بتتوحم عالخطابه
- الجميع** : مايعرفش. مايعرفش. مايعرفش (يكون جعلص قد ذهب إلى الطاولة بإشارة من السكرتير)



- محرم : هس
- جعلص : مين هو اللي مايعرفش يا غجر. مين هنا يجي يخاطبني فيكم مين
- محرم : (يهزه من كتفه) من فضلك من فضلك. اتكلم في الموضوع. هو
- جعلص : ديهدني. طول بالك يا حضرة السكرتير. أنا موش لي حق اخطب وبس أنا لي حق الانتخاب في اربع خطوط حته واحده
(...)^[1]
- الجميع : سيبه يخطب. عايزين جعلص. عايزين جعلص
- محرم : (بحدة) هس قلنا. يا جماعه موش كويس كدا عيب. إحنا هنا في اجتماع رسمي
- موش في حمام
- جعلص : (بعد لحظة) أيها الساده
- أم أحمد : ساده إيه وسكر إيه ياختي. إنت حا تتراجع يا نيله
- الجميع : هس يا نيله^[2]
- جعلص : (يكح) بقى أنا يا اخواني حاتكلم دلوقت بلسان التلاتين عربي اللي انتخبوني في طايفتنا
- أم أحمد : ياختي على ننوسها. ما اعدمكش يا جعلص
- جعلص : (يكح بعظمة) زمان يا اخواني في الزمان الذي مضى. ماكانش فيه في البلد غير الكام عربيه اللي من غير كاوتش اياهم. والكام زبون الطيبين اللي زيكم إنتم.
- والكام بغل بتوع سوارس
- الجميع : هي هي هي هي هي هي هي
- جعلص : لكن دلوقت يا اخواني طلغوا لنا فيها وخلوها خل خالص. قالوا لنا ركبوا كاوتش للعربيات. حاضر. إمشى عالمين. حاضر. خليك مولع قدام ومولع ورا. حاضر. طلغوا لنا الترمواي. حاضر. التاكس. حاضر. الشاويش يشوح بأيديه في الاربع مفارق زي عفريت العلبه حاضر...
- الجميع : ليحيا جعلص
- جعلص : الغايه. كل دا يا اخواني. والعربي متثيل على عينه وساكت. الخيل برضها غاليه نار. العليق أغلى واغلى. طقم الخيل بالشيء الفلاني يعني بالله عليكم شوفوا بدنا كل يوم ناكل بكام. أنا وأم أحمد والبهايم
- أم أحمد : يو جاك حوسه

[1] جزء مفقود من نص الرواية.

[2] تغيرت: وليه.



- جعلص : أيها الساده
- محرم : أيوه كده اتكلم بأدب
- جعلص : حاضر. البهايم أيها الساده
- الجميع : إنزل إنزل
- محرم : هس
- جعلص : أهم حرنوا قوام اهم. البهايم يا اخواني
- الجميع : موش عايزين. موش عايزين. موش عايزين
- أم أحمد : عجبك كده ياسي جعلص (في خلال ذلك يكون السكرتير قد أجلسه على كرسى بجانب أم أحمد مطيَّبًا خاطره)
- دقدق : (واقفًا) بردون شويه هنا يا سيدنا لفندي
- محرم : إيه جرى إيه يا جدع
- دقدق : ما جدعش روق. الله الله. أنا زى دول وزياده شويه كمان
- الجميع : إطلع فوق. إطلع فوق. إطلع فوق (يصعد على المسرح)
- دقدق : (لمحرم) بالكش يا افندي. إنتو إن ماكنتوش تجعلوا حسَّيه تمام للشخص ابن المفهوميه منا وتعبرونا تمام. نخلي لكو الانتخاب دا سكالنس والاسم الاعظم
- الجميع : أهه كده
- محرم : وقصدك إيه يعني دلوقت يا حضرة الشخص. عايز تخطب إنت لآخر
- دقدق : وابوها. ايشمعنى اخينا الدبل ده (مشيرًا على جعلص) تلاغيني يا أوسطى
- جعلص
- جعلص : (واقفًا) إيه يا واد (تعترضه أم أحمد)
- محرم : (بحدة) وبعدين يعني وياكم. (لدقدق) إنت جاي هنا تنتخب والا تخش باط
- الجميع : أخطب أخطب أخطب (يشير إليه السكرتير فيذهب لمكان الخطابة)
- دقدق : بقى شوف يا ابن والدي إنت وهو. قال اللي تختشي من بنت عمه ما يجبش منها...
- الجميع : حمار
- دقدق : لطافه خالص. دلوقت يا اخواني. أنا طالب من الدلعدي الحكومه. ولا يكتر على الحكومه. طالب بالنيابه عن كل ولاد الخط العتر. الواد ابو قوره والواد بطيخه والهو وشمردل والاشول وابو دومه والجن طالبين أولًا. إن الحكومه تنبه على قلم الصحه. وقلم الصحه ينبه على اخواننا الاجزاجيه. اللي ما حد عارف إن



- كانوا اجزائيه والا مخانجيه والا خامورجيه والا سماويه
- محرم** : عايز الحكومه تنبه عليهم بيايه بس. اتكلم في الموضوع
- دقق** : تنبه عليهم أولًا. إنما تنبيهه بريفكس. بعدم بيع الكوكو الابيض والمورفين وكافه اصناف المشروبات الروحانيه والسميات اللي أذت لنا ولاد الناس الطيبين وخربت بيوتهم
- الجميع** : (مصفقين) براقو براقو براقو
- دقق** : آه. اهه كدا الحق. ماذا وإلّا. يرخصوا لنا احنا الحسن كيف البلدى التمام.
- الجميع** : الحسن كيف اللي يرم صواميل المخ ويعدل ترترة المزاج
- محرم** : يابن البلد يا نكته
- محرم** : (ضاحكًا) إنما يعني ايشمعنى عايزهم يبطلوا الكوكايين والمورفين والخمره والحسن كيف لأ
- دقق** : معلوم. علشان دي كلها واردات افرنجيه. أما الحماس البلدي. هو البضاعه الوطنيه التمام. الوطنيه يا خلايق. لأن إذا قام الواحد منا بلا قافيه اتدرمخ منه والا اتوفى. حتى يبقى اسمه وقتها مات موته وطنيه. والله يحب الوطنيين. سلام عليكم (يعود لمكانه)
- الجميع** : أعد أعد (مصفقين)
- أم أحمد** : (لجعلص) شايف يا نخ. أهه دا مايحيش ورك منك ده
- ابو قراةة** : (واقفًا بحدّة) أعوذ بالله. دوشتمونا فلقتمونا. قلقتمونا
- محرم** : إيه مالك يا شيخ ابو قراعه. زعلان ليه. تجي تخطب والمسأله في حموها
- ابو قراةة** : دونكم والخطابه (يصعد المرسخ)
- الجميع** : هه (يصفق الجميع)
- محرم** : هس. اسمعوا بقى رأي الشيخ ابو قراعه
- ابو قراةة** : (يكح) أيها الساده والسيدات. الحاضرون والحاضرات. الناخبون والناخبات
- أم أحمد** : أبوك السقا مات
- الجميع** : أعد أعد أعد (يصفقون)
- محرم** : هس. يا ناس في عرضكم موش كده
- ابو قراةة** : يا اخواني ويا ساداتي. إذا أنا زللت فاعفروا لى زلتني. وإذا هفوت اصفحوا عن هفوتي بالمعروف أو باللتي
- الجميع** : براقو (يصفقون)



- ابو قراعة** : لقد قضيت ليالي وأياما. وضعت فيها الحكمة لي إماما. ورسمت لكم بعد
السكوت بروجراما
- الجميع** : الله الله الله
- ابو قراعة** : لنا في هذا البرلمان مطالب ثلاث. ليس فيها شك ولا التباس. فلتكن لحزبنا
كأساس. واعملوا بها أيها الناس
- أم أحمد** : أحسنت يا شيخ رسراس
- محرم** : إيه المطالب الثلاث دي بقى
- ابو قراعة** : أوّلًا. مراقبة السيدات في لبسهن الموده. حريراً كان أو سكروده. فلا نسمح لبناتنا
لبس البرقع الشفاف. ولا للفرنجيات بالخروج عاريات الأذرع والأكتاف. هذا ما
يجب من شره أن نخاف. وإلا أصبحت حياتنا اكسان تجيه اكسان جراف^[1]
- أم أحمد** : أعد يا عم الشيخ لحاف
- الجميع** : أعد أعد أعد أعد
- ابو قراعة** : ثانيًا. مراقبة الروايات الهزليه. لتكون مهذبَةً من جميع الوجوه وتطهير المراسح
من رقص بطن واه وواه. فالذي يقبل اقبلوا عليه. وإلا فقاطعوه وهزأوه وقولوا
عليه اتفوه ثم اتفوه
- الجميع** : إتفوه ثم اتفوه
- دقدق** : ليحيا الشيخ ابو قراعه
- الجميع** : ليحيا الشيخ ابو قراعه
- أم أحمد** : أيوه هات ياخويا من قراعتك هات
- ابو قراعة** : ثالثًا
- الجميع** : هه
- ابو قراعة** : تغيير اسم شارع عماد الدين باسم مناسب جديد. فبدلاً من أن يقال شارع
عماد الدين. يقال شارع عماد الدين بورا أو شارع عماد الدينالسكا
- الجميع** : الله. أعد أعد أعد أعد

[1] "اكسان تجيه اكسان جراف" بالفرنسية: () accent aigu () accent grave.



- ابو قراعة** : هذه هي مطالبنا القراعية الثلاث. فمن قبلها خدم مصر وآمالها. ومن رفضها واستحمر. فليس له غير السلاح الأحمر
- الجميع** : يحيى الشيخ ابو قراعه. يحيى الشيخ ابو قراعه. يحيى الشيخ ابو قراعه (تصفيق)
 حاد يعود في خلاله الشيخ إلى مكانه)
- محرم** : (مصفاً لاسكاتهم) هس يا جماعه. دلوقت حيث إن الساعه بقت ١١ ونصف.
 ولسه رئيسنا رجب بيه ماجاش. أحسن شيء إنكم تنصرفوا دلوقت وتبقوا
 ترجعوا بعد ساعه
- الجميع** : وهو كذلك
- الافندي** : ليحيا رجب بيه
- الجميع** : ليحيا رجب بيه (يخرجون تدريجياً على مقدمة اللحن الأول)
- محرم** : (وحده) يا حفيظ. أما حتة كشكول مغفلين لكن ما فيش كده. أنا عارف بس
 رجب بيه جوز بنت عمي كان ماله ومال الانتخابات ودوشتها دي
- الحما** : (داخلة ووراءها عزيزة هانم ابنتها) هو فين امال محرم بيه
- محرم** : أهلاً. آديني ايه يا خالتي. أظن إنتو حا تتغدوا النهارده هنا في السلامك
- الحما** : النهارده وبكره كمان. على بال ما يخلصوا المبيضين من بياض البيت فوق
- محرم** : وكنتو فين من الصبح. في مصر الجديده؟
- الحما** : أيوه. والله ابن حلال
- عزيزة** : تصدق يابن عمي إن احنا جايين مكروشين الكرشه دي كلها علشان نتفرج على
 الاجتماع بتاع النهارده
- محرم** : بس بس يا شيخه. بلا اجتماع بلا غيره
- الحما**
- وعزيرة** : بتقول إيه
- محرم** : (للحما) باقول إني لو ما كنتش مضطر بحكم ظروف إني اشتغل سكرتير عند رجب
 بيه. كنت من زمان استعفيت لاجل خاطر الانتخابات بتاعته الي فلقتني دي



- الحما : والله طيب يابن اخويا
- عزيزة : والله طيب يابن عمي
- محرم : آه. وارمي في بستفه بقي
- الحما : (ذاهبة إليه) بقى يعني دا كل اهتمامك ممسألة الانتخابات يا حضرة الافندي.
- دا مبلخ حب واحد متعلم زيك لبلاده
- عزيزة : دا مبلخ إخلاصك لرئيس حزب عاملك السكرتير الخصوصى بتاعه
- محرم : وبعدين بقى
- الحما : آه يا خسارة تربيتي فيك يا محرم آه
- محرم : يا ستي طيب وانت محموه قد كده ليه بس
- عزيزة : ليه؟
- الحما : ماتعرفش حضرتك ليه. ماتعرفش إن رجب بيه جوز بنتي. أول شيء حا يطلبه لما ينتخبوه نايب في البرلمان. إنه يتكلم عن المرأة المصريه. ويطلب إنها تكون
- مرشحه
- محرم : مرشحه لإيه
- الحما
- وعزيزة : لعضوية البرلمان
- محرم : إبقى قابليني
- الحما : ليه. غريبه بقى. غريبه يا افندي إن واحده زيي أنا. تكون بكره نايبه
- في البرلمان
- محرم : بس بس يا خالتي بلاش هلوسه
- عزيزة : شفت يا نينه. موش قلت لك
- الحما : معلوم. طالع للمرحوم ابوه. كل شي له يشبه له^[1]
- محرم : والنتيجه يعني. لسه فاضل كتير في الاسطوانه

[1] "كل في له يشبه له..." مثل شعبي وبنفس المعنى "الطيور على أشكالها تقح" مثل شعبي.



- الحما** : فاضل إنك لازم تفهم كويس يا ادلعدى إنه آن الاوان. بل حانت الساعه الي
يجب فيها إن المرأه المصريه تستيقظ وتقوم تطالب بحقوقها المهضومه. فاضل
إنك لازم تفهم كمان. إن مافيش شيء موخرنا احنا يا مصريين غير استهتارنا بكل
حاجه. وعدم ثقتنا في انفسنا
- محرم** : (متهكمًا مصفًا) براقو. أعد. أهو إنتو الي فيهم. إنت والشيخ ابو قراعه
- عزیزة** : سيبك منه يا نينه. دا قصده يعاكسك بس
- محرم** : كل الي قلتيه دا كويس يا خالتي. لكن إيه الرأي دلوقت
- عزیزة** : (وقد نظرت إلى الداخل ثم عادت) الرأي إنك تسيبنا شويه بقى. أحسن جماعة
زامر بيه وإحسان بيه جيراننا جاين اهم
- محرم** : (ملتفتًا) لا. ما دام المسألہ فيها ستات. أما افك أنا. سبحان من خلصني من
لسانها (يخرج)
- عزیزة** : إلا موش عيب يا نينه. إننا نستقبلهم هنا في السلامك
- الحما** : لا ما هم عارفين إن البيت مشغول فوق. مافيش تكليف
- السيدات** : (داخلات) فین أبلتي امال
- الحما**
- وعزیزة** : أهلاً وسهلاً. أهلاً. اتفضلوا
- مرة ١** : إحنا يا أبلتي جاين نشوف رجب بيه
- مرة ٢** : جاين نعرض عليه مطالبنا
- الحما**
- وعزیزة** : أهلاً وسهلاً
- مرة ٣** : بس إن شا الله يكون جمع أصوات كتيره
- الحما** : أصوات وبس. طيب وحياتك إنت لا اخئي لك نص البلد تصوت له
- عزیزة** : لتحى السيده المصريه
(لحن يدخل في خلاله رجب بيه)



لحن

دا وقتك دا يومك يا بنت اليوم قومي اصحي من نومك بزيادة نوم
وطالبي بحقوقك واخلصي م اللوم
ليه ماتكونش زي الغربيه وتجاهد في حياتنا بِحُرِّيَّه
شطاره شاطرين قداره قادرين مين في دردحتنا وخفتنا دي مين
معانا شهادات ودبلومات ونعرف بولتيكه ونعرف لغات
ليه ماتكونش يا بيه زي الراجل ليه قولوا لنا هو زايد عننا إيه
ليه جوزي ما يجلسش محلي يکنس لي ويطبخ ويقلي
و انا اروح اقضي له اشغاله وعيشتنا تبقى ترلي
إيشمعنى في أوروبا الستات لهم صوت في الانتخابات
احنا كمان لازم نفوقهم هنا في بلادنا ونكون فوقهم
دي المصریه من نشأتها مافيش زيها ست في بيتها
إن كان في حبها لبلادها والا في تربية ولادها
آه. ايه البطل جالكو يا ستات أهه البطل ايه شرف وجالنا
مين زيه دا ياهو ما بين رجالنا
مين في شهامته مين على العهد أمين
يا بيه إنت الضمين بلوغ أملنا يا هانم آدي إيدي في إيدكم
يمين مقدس لا احيد عنه من كل قلبي أنا اساعدكم
لحد ماتفوزوا وتتهنوا دا يبقى يوم عيد في تاريخنا
وخطوه هاي له في نهضتنا لما سانا احنا تشار كنا
في كل غايه وأمنييه وفي كل حركه وطنيه
يا مرحبا ببنتات اليوم وأمهات مستقبلنا
أديكو فقتم صح النوم يالا ادخلوا في صف رجالنا
وحطوا إيدكم في إيديهم
وخففوا الحمل عليهم وفهموا العالم كله
بجرأه كده وبِحُرِّيَّه فضل الفتاه المصریه



- رجب** : (بعد اللحن) أنا ممنون جداً يا هوانم. يا ابطال الجنس اللطيف من مظاهرة التشجيع دي اللي باغتوني بها دلوقت. وان شاء الله. استمد من عطفكم اللطيف عليّ ده. قوه عظيمه للسير دائماً إلى الامام
- السيدات** : مرسي رجب بيه
- رجب** : بس الشيء المهم عندي دلوقت. الشيء اللي وقفت عليه كل مجهوداتي في الحركة الانتخابيه دي. إني انتصر على عدوى شوال بيه. واسحقه في ميدان الانتخاب
- السيدات** : شوال بيه
- رجب** : أيوه شوال بيه. رئيس حزب المليسين
- السيدات** : ليسقط حزب المليسين
- رجب** : لأ والغريبه. إني أنا وشوال بيه ده. من ايام المدرسه كنا عدوين في اغلب مواقفنا الحيويه عدوين. في الانتخابات النهارده عدوين لدرجه إنه داير يعاكسني مطرح ما اروح. ويرشى الجماعه اللى مرشحنى بأمواله علشان يشتري أصواتهم
- الحما** : ماعلش يابنى. ربنا دائماً ينصر الحق على الباطل
- رجب** : ياخي ويا ريته اكتفى بكده بس.. إلا قال إيه. علشان يشوه سمعتي في نظر رجال الحزب بتاعي. أنشأ جرنال مصور ساقط زي ده. للطعن فيّ وسماه الخازوق (يخرج جريدة من جيبيه)
- السيدات** : أما اسم نكته (يضحكن)
- الحما** : (لمحرم) ماعلش ولاتهتم به أبداً. عيب إن واحد زعيم حركة زيك. يوطي نفسه ويرد علي الوقح بتاع الخوازيق ده
- رجب** : الغايه. دلوقت أنا والراجل شوال بيه ده. زي قائدين بجيوشهم في ميدان الحرب. أنا زعيم حزب المقابسين. وهو زعيم حزب المليسين يا أنا يا هو
- الحما** : آه من حق اصبر يا جوز بنتي
- رجب** : إيه فيه إيه
- الحما** : تعال شوف تعال. علشان تعرف إيه مبلغ اهتمامى بمصلحة بنات جنسي (تبحث في جيوبها)
- رجب** : إيه. مقاله
- الحما** : أهه سودتها كده بالقلم الرصاص واحنا جاينين دلوقت من مصر الجديده في المترو



السيدات

- ورجب : في المترو في المترو
رجب : دي لازم مقاله كهربائيه خالص. وريني كده اما اشوف
الحما : (وقد أخرجت الدفتر) أهه
رجب : (ضاحكًا) ديهدة يا حماي. إنتِ كاتبه المقاله في دفتر اللحمه والخضار
الحما : أيوه حاعمل إيه. ما دام كانت المقاله حرقاني وانا في المترو. اهه مالقيتش
قدامي غير الدفتر ده. وبعدين رحتم عامله فيه مسوده مؤقتًا
رجب : إلا دفتر اللحمه ده (يشم الدفتر) دي طالعه مقاله زفره خالص (تضحك
السيدات)
الحما : بس بس خلينا في الجد. اسمعوا يا ستات
رجب : (يقرأ) أيها الرجال المستبدون. إن المرأة منا بطبيعتها وبحكم ضعفها هي دائماً
في احتياج إلى الحريه وإلى.. جوز كوارع بسته صاغ
السيدات : (باستغراب) هه (يضحكن)
الحما : بيقول إيه ده. يا شيخ اقرا في ناحيه واحده بس
رجب : وإلى كل ما يرفع شأنها في الهيئه الاجتماعيه. ولا تتسى أيها الرجل إن المرأه منا
عندها كرامه. عندها شعور. عندها. فلفل بسته مليم
الجمع : إيه إيه
الحما : ياخويا هات أما ابضها إنت لآخر
رجب : استنى طولي بالك. ولا يفوتكم إن المرأه منا. متى انتخبت في البرلمان صح لها..
بيض بتلاته تعريفه
السيدات : أما نكته العبارة دي (يضحكن)
الحما : (وقد اختطفت الدفتر من يده) نعم. وبتضحك كمان
رجب : لا موش القصد يا حماي. أنا بس.. لو تحبوا تسمعوا مني نصيحه يا ستات.
لطفوا شويه من حده التحمس بتاعكم ده مؤقتًا وانا اوكد لكم إني متى
انتخبت في البرلمان. أفتح لأول فرصه موضوع المرأه المصريه واضحى فيه كل
مجهود في استطاعتى
السيدات : مرسي رجب بيه
مرة ١ : (للحما) اسمحي لنا بقى يا تيزه. أحسن ميعاد الغدا جه



- الحما : لا لا مستحيل
- عزيزة : لازم تتغدوا عندنا النهارده
- السيدات : لا لا بالله
- الحما : ياللا فوتوا بنا عالناحيه دي
- السيدات : طيب اورقوار يا بيه
- رجب : اورقوار يا هوانم
- السيدات : اتفضلي يا اختي. لا بالله. اتفضلي يا سنيه هانم (تخرج السيدات)
- رجب : بقى برضه الحاجات النواعم اللطيفه دي. يصح إنها تكون أعضاء. أمال احنا ياللي اتخلقنا أعضاء خالص نعمل إيه
- محرم : (داخلاً) ديهدة. إنت كنت فين يا سيدنا البيه. الجماعه المنتخبين بتوعك مشيو وراجعين لك بعد شويه
- رجب : طيب يا حضرة السكرتير. إنما طمنى قبله. إزاي الحال. موش معدن
- محرم : معدن قوي. بس الست حماك ملهلبه خالص علشان مسألة الانتخاب
- رجب : آه. إنت بالك. أنه توافقها على قد عقلها. بس اوعى تقول لها كده احسن بعدين تسود عيشتي
- محرم : لا لا موش عيب
- رجب : أيوه يا حظ. أحسن دي حاجات ما اقدرش اصرح بها إلا لك إنت بصفتك السكرتير
- محرم : طبعاً. بس بصفتي سكرتيرك كمان يا رجب بيه. كان لازم اعرف سبب التغيير اللي لاحظته عليك من يجي اربع خمس تيام دلوقت
- رجب : صحيح؟ لاحظت حاجه
- محرم : أيوه. لازم تكون بتحب نتايه من هنا والا من هنا
- رجب : آه يا سكرتير الأنس يا حدق إنت
- محرم : باقول لك فراسه
- رجب : أيوه. بس الشيء اللي فراستك خبيت فيه يا بطل. هو إن نتايه دي. موش مجرد واحده من هنا والا من هنا زي ما بتقول
- محرم : أمال إيه. واحده متجوزه
- رجب : متجوزه قوي. على كل حال أنا ما اعرفش جوزها. وكل اللي قالته لي. إنها



متجوزه واحد اسمه شاكربيه بيشتغل في البورصة وتجارة الاقطان. معظم اوقاته في السفر

محرم : إش عال عال. ولكن إيه كان أصل المعرفة دي بقى
رجب : أصلها صدفه غريبه جداً يا محرم بيه. ديك النهار كنت رحب بالصدفه اشتري مناديل من محل شيكوريل. قمت لقيت جوه واحده هنومه لكن في غاية الشيك. بارزيان (متنهدان)

محرم : يا حفيظ
رجب : أنا يا دوب لسه واقف بامحك. يا دوب بابص لها بصبه والتانيه وعنها وتك وراح النور مطفي في المحل كله

محرم : يا خبر وبعدين
رجب : وبعدين يا افندم فضلت احسس بأيدى كده لحد ما عتريت فيها. وهى لوخره راحت ماسكه في دراعي. وعنها وفضلنا نسحب في بعض ونتخبط في كل بنك وفي كل مستخدم وفي كل زيون شويه لحد ما طلعنا على وش الدنيا
محرم : أما معرفة نكته قوي

رجب : بالاختصار ما اطولش عليك البنيه استلطفتني واستلطفتها لأني بعد الحادثه دي شفتها ثلاث اربع مرات في شارع بولاق وهي كل مره تبص لي من بعيد وتضحك لي. فا فضلنا كده عالمناوره دي لحد النهارده الصبح بس

محرم : النهارده الصبح إيه
رجب : كنت بالصدفه باودع واحد صاحبي في محطة مصر. وبعدين بالصدفه لقيت صاحبتنا دي لوحدها على رصيف المحطه. فتجرت وسألتها مسافره يا هانم. فقالت لي بعد تردد بسيط طبعاً. إنها جايبه تودع واحده صاحبها. وانها مسافره بعد الظهر على طنطا علشان تعالين كام فدان لقطه عايزه تشتريهم هناك

محرم : كويس خالص
رجب : فأنأ دغري في الحال جات لي فكره إني اعرض عليها نفسي لمعاينة الأرض دي. وقلت لها بالكذب إني مستخدم خبير في وزارة الزراعة
محرم : أف. أما حته دين روايه
رجب : بس. وحتى لما سألتني عن اسمي. قلت لها بالكذب إن اسمي محرم بيه ذهني



- على اسمك
- محرم** : شي لطيف خالص. لكن هه. وبعدين قلت لها إنك تعالين لها الأرض
- رجب** : إيما كل اللي قدرت افهمه من كلامها إنها ماتعرفش حد في طنطا وربما إذا اضطرها الحال. تنزل في أي لوكانده هناك. ولا يخفاك إن اللوكاندات هناك ما يزيدش عددهم عن اتنين او ثلاثة يعني شي (...)^[1]
- محرم** : إش عال
- رجب** : بس المهم دلوقت إني اختلق لي أي سبب علشان اسافر على طنطا. من غير ما تلحظ حمايتي والا مراتي
- محرم** : آه. أهه دي
- الحما** : (من الداخل) هو فين البيه يا فريدة
- رجب** : آه حمايتي. هس قفل في عرضك. أما اروح أنا اوضب أي حجه للسفر النهارده من كل بد (يخرج بلهفة) أورقوار
- محرم** : أورقوار بس ماتغيبش. أحسن المنتخين راجعين لك أما نكته الحكايه دي
- الحما** : (داخلة لمحرم) الله هو فين جوز بنتي امال. خرج؟
- محرم** : أيوه. بس عنده مشوار صغير وجاي حالاً
- فريدة** : (داخلة) ادلعي يا ستي الكبيره
- الحما** : إيه يا فريدة
- فريدة** : فيه واحد عمده بره بيسأل على سيدي البيه. وبعدين قلت له خرج ولا فيش إلا الست حماته. قام قال لي اقابل حماته
- الحما** : (آخذه الكارت في يدها) ودا إيه ده. الكارت بتاعه
- فريدة** : أيوه
- محرم** : يا ترى مين بسلامته العمدة ده
- الحما** : (تقرأ) رمضان بيه سالم أبو حويجة الدنف من أعيان برما غربية
- محرم** : برما دي مين كمان. آه اظن جهة طنطا
- الحما** : (لفريدة) طيب خليه يخش. أنا اقبله أنا ومحرم بيه أما نشوف عايز إيه
- فريدة** : حاضر يا ستي

[1] كلمة غير واضحة بالنص.



- محرم** : إياك على الله يكون خير
- الحما** : لازم يا محرم يابني. لأن عيني اليمين دي نازله رف من صباحة ربنا
- العمدة** : (من الداخل) أيوه قلت لك. أنا رمضان سالم أبو حويجة الدنف من برما غربية
(داخلاً) سلام عليكم
- الحما ومحرم** : وعليكم السلام. أهلاً وسهلاً
- العمدة** : بدستور قبله. مين فيكم يبقى حماة البيه (يضحكان)
- محرم** : ديهدي. أهه حضرتها الست (مشيراً على الحما)
- العمدة** : البت الخدامه بتاعتكم هي اللي قالت لي. إن الست الكبيره ايزاك جوه قلت
لها اقدر اخش عليها. قالت لي خش. رحت خاشش على طول. سلامات سلامات
(تضحك الحما)
- محرم** : (على حدة) دا باينه لطخ^[1]
- الحما** : إنت آستنا خالص يا حضرة العمدة
- العمدة** : الله يؤانسك. إلا بدستور قبله. حضرته يبقى مين
- الحما** : حضرة السكرتير بتاع رجب بيه
- العمدة** : ستركير دا يبقى إيه كمان. خوجه فرنساوي
- فريدة** : (داخلة) ادلعي ياسي محرم. كلم في التلفون قوام
- محرم** : هه. طيب خليك إنت هنا مع ستك (يخرج بلهفة) أنا جاي حالاً
- فريدة** : حاضر
- الحما** : بقى حضرتك عايزني أنا يا ادلعي. والا عايز رجب بيه جوز بنتي
- العمدة** : ماعلش. أهه إنت وجوز بنتك واحد مافيش فرق
- الحما** : طيب فيه إيه في الخدمه
- العمدة** : فيه إني أنا يا حضرة الحموايه. ما اكرهش حاجه في الدنيا قد الجماعه بتوع
- حزب المتليسين دول اللي في بلدنا
- الحما** : يا سلام. حتى في بلدكم كمان لهم حزب

[1] تغيرت: لوج



- العمدة** : أيوه. إفا الانكت من كده. إن لهم رئيس اسمه شوال بيه دايرين يرشحوه
للانتخاب. وهم لحد النهارده لسه ماحدش شاف جنس فورمة خلقته إيه
- الحما** : قطعم بعيد عنك هم وشوال بتاعهم
- العمدة** : وادي حتى خازوق من خوازيقه اهه (يضعه على الطاولة بجانبه) القصد ما
اطولش عليك يا ست. أنا لوخر رحمت متشمر وعملت ضدهم في بلدنا حتة
حزب لكن ممكن
- الحما** : تسلم همتهك يا ابو حويجة
- العمدة** : الله يسلمك. إفا أنا علشان افرس الجماعه المتليسين دول. قعدت أسأل
واستقصى لحد ما عرفت إن الراجل شوال بيه بتاعهم ده. مالوش عدو في الدنيا
غير رجب بيه جوز بنت حضرتك. وعليه رحمت مسمى الحزب بتاعنا اللي في
البلد حزب المقايسين
- الحما** : دا شيء لطيف خالص. ولكن إيه اللي عايزه حضرتك دلوقت من رجب بيه
- العمدة** : اللي أنا عايزه أولاً إني استعرف بحضرة جنبه علشان أراسه عالحزب اللي
في بلدنا
(...)^[1]
- العمدة** : أصبر إيه يا حضرة العمدة. مدرك إيه يا حضرة العمدة. والحاجات المقلب دي
بتاعة النساء. لكن على مين
- الحما** : (ضاحكة) الغايه. حيث إن المسأله فيها انتخاب جوز بنتي. لك عليّ يا رمضان
بيه. إن أول ما يجي دلوقت. أخليه يسافر حالاً موش عالغريبه بس. بل على
كل بلاد وجه بحري
- العمدة** : أهه كده. وانا كمان اتكألاً على الرندفوه بتاعك ده. آديني مسافر دلوقت حالاً
على بلدنا وحامهد كل طريق لانتخاب رجب بيه
- الحما** : روح الله ينصركم على الغجر دول
- العمدة** : أخ يا ناري. بس ما اشوف وشك يا شوال يابن جماد أول. يا مغيث. طب دا اللي
يقول حياه على رئيس الحزب بتاعنا. دانا اشرب من دمه. يا سلام ياولاد (يخرج)
- الحما** : اهه كده الرجاله والا بلاش. هو فين ادلعدي جوز بنتي أما افرحه فين (تهم
بالخروج)

[1] جزء مفقود من نص الرواية.



- فريدة : ادلعي يا ستي
- الحما : فيه إيه يا فريدة
- فريدة : واحده ست بتسأل على حضرتك بره علشان الدور الفاضي بتاعكوا اللي في اول الشارع
- الحما : آه. طيب خليها تخش
- فريدة : حاضر يا ستي (تخرج)
- الحما : غريبه الست دي اللي جايه في حصة الغدا. الغايه أما نؤجر الشقه دي بالمره وخلينا ننفض
- فريدة : (داخلة) اتفضلي يا ادلعي
- زبيدة : (داخلة) بونجور يا هانم
- الحما : بونجور أهلاً وسهلاً. اتفضلي يا هانم استريحي. فيه إيه في الخدمه
- زبيدة : (جالسة) بقى أنا جايه لحضرتك علشان الدور الفاضي بتاعكوا اللي هنا في أول الشارع
- الحما : أهلاً وسهلاً. بس كده
- زبيدة : أنا اتفرجت عليه امبارح. هو فيه ست أود. موش تمام
- الحما : أيوه سته. وفيه الكهربا والميه و....
- زبيدة : مفهوم مفهوم. لكن المهم قبله. أجرته كام
- الحما : ١١ جنيه يا هانم
- زبيدة : أوه. لا. دا غالي قوي
- الحما : يا سلام. ١١ جنيه كتير على بيت صحي زي ده. وبتضرب فيه الشمس ليل ونهار
- العمدة : (داخلاً) بردون لا مؤاخذه
- الحما : إيه. نسيت حاجه
- العمدة : أيوه. الخازوق اللي كان معايا نسيتته هنا (بحدة) آه أهه
- زبيدة : ديهده. دا العمدة اللي كان عندنا الصبح (تنظر إليه)
- العمدة : يا نهارك اسوح يابو حويجة



- الحما : الله إيه مالك
- العمدة : دي الست جماعة شوال بيه اللي كنت حداها الصبحيه
- الحما : هه
- العمدة : إزيك يا ست شولايه. الراجل جوزك لسه ما بابنش. ماعلش الصبر طيب. مسير
الوجوه تتلاقى (يخرج)
- زبيدة : بيقول إيه ده
- الحما : (لزبيدة) بقى حضرتك مرات شوال بيه يادلعدى
- زبيدة : أيوه يادلعدى
- الحما : مرات شوال بيه. ولكِ وش تجي تخشي هنا في بيتي. فهميني دلوقت تودي
وشك مني فين
- زبيدة : وشي. أوديه مطرح ما أنا عايزه
- الحما : والخازوق بتاعكوا يا هانم. الخازوق توديه فين
- زبيدة : الله. دى بابنها سرايه خالص. فهميني بس يا هانم. خازوق إيه وغيره إيه
- الحما : بقى لسه ماتنيتش فاهمه. ماتعريفش إنك هنا في بيت رجب بيه فهمي عدو
جوزك الألد
- زبيدة : آه. قولي كده. بقى أنا دلوقت في معسكر الأعداء
- الحما : أيوه في معسكر الأعداء. وعليه اتفضلي حالاً وربني عرض اكتافك
- زبيدة : قوام كده
- الحما : (بحدة) الخازوق يا هانم. الخازوق. الخازوق. الخازوق
- زبيدة : إمشي خازوق في عينك مره ملحوسه (تخرج)
- الحما : بتقول إيه. أنا ملحوسه. وبتشتمني في بيتي كمان. ليسقط حزب المليسين
(تخرج)
- رجب : (داخلاً) أف. دا شيء وحش خالص
- محرم : (داخلاً) الله الله. تعالي بس فهمني. إيه الحكايه يا سيدنا البيه
- رجب : دور لي يا اخي من تحت الأرض على أي حجه اسافر بها على طنطا حالاً



- محرم : على طنطا. علشان تحصل صاحبتنا مرأة شاكرا بيه
- رجب : أيوه. لأنها مسافره في قطر تلاته. وانا بدي ارواح وراها كده سكييتي
- محرم : والله إن جيت للحق المسأله عايزه فكر يا رجب بيه
- رجب : شوف لي حالاً أي طريقه كده والسلام. هه. قول. اخلص. اتكلم. انطق ياللا
- محرم : يا سلام. دي الحب ملهله خالص
- الحما : (داخله) أيوه يا هوانم
- رجب : إخص
- الحما : حضرة الزعيم بتاعنا اهه (تدخل الهوانم)
- رجب : (على حدة بخوف) ماحناش مسافرين في نهارنا
- الحما : (لرجب) ياللا يادلعدني ياللا. إلفع شنطتك وسافر دلوقت حالاً
- رجب : (بفرح) أسافر دلوقت حالاً
- محرم : إش عال
- الحما : الغربية كلها يابني منتظره تشريفك على نار. الأهالي عايزين منك خطبه واحده
- بس. علشان ينتخبوك حالاً عضو في البرلمان
- السيدات : براقو (يصفقن)
- رجب : غربية إيه وقلبية إيه يا حماي
- الحما : هس ولا كلمه. لازم تروح ترشح نفسك حالاً في الغربية من اولها لآخرها.
- وبعدها ترجع لنا رافع راية الفخر والانتصار
- رجب : (لنفسه) اش جات عالططاب
- عزيزة : (لرجب) الله إيه مالك. موش عايز تسافر
- رجب : هه. أيوه. بس (متنهداً) قلبي موش مطاوعني يا روجي. أسافر إزاي واسيبك
- إنت وحماي. إزاي (يتصنّع البكاء)
- السيدات : آدي العواطف والا بلاش
- الحما : يستحيل يا ابني. لازم تسافر دلوقت حالاً. دا شيء يتعلق باسمنا وشرفنا



رجب : (يمسح دموعه) طيب يا حماي الشرف قبل كل شيء

محرم : مسكين

(...)^[1]

لحن

لا يشمتوا فيكم الأعادي
إوعى بس يا بيه تنسانا
لحسن يا بيه يبقى إهانه
يا مرحبا بكم إيدكم في إيدنا
ليحيا النيل وليحيا رجاله
أهه مجدنا لاحت أنواره
قولوا معايا إلي النهايه
إجعل لنا صوت في الانتخاب
لازم احنا نكون نواب
ضموا طلبكم على مطالبنا
اللي هم كل آماله
وسعدنا اهه هل هلاله

ستار

[1] جزء مفقود من نص الرواية.



١٤٤

الفصل الثاني

(برفع المسارحة مدخل الاوتيل والفلامون وانثون وريفصون)

اعدكم (بعد الذين وفروا الاقاصت) كسسى وادى عم صفراندى
صاحب اللوكنده الله. (وصفقون لرخول النندق وهو ملل بيده حشر)

يعنى حزب سوال بيه

يعنى حزب سوال بيه

كل دالكويس يا بنونى . وابقى مقدمه حزب السوال بيه نرى هانتهم

راسييه بس اجولكم تدهموا نقطه واحده

ايه باعم صفر

بقى انا سميت لكم بالاجتماع هانا فى ملل ابارح والتارده ولكن ما

تسوتش امدواشى لراستى رعا بفضرتى ذ اللوكاشنى

البح لك عمده

تم عمده جولا ثانيا الزايد هما راكيس شريكى فى اللوكنده دى. بينعل انثى

سه اجتماعنا هانا فعلوا ارجوكم تتفضلوا سه غير طردو. وقولوا سايلا

بااعلا صوتكم جميعا يعنى سوال بيه

يعنى سوال بيه (لترجوه صفتين)

صفرانى . سيمانه سه مرفكاسم. الفتيه انى سمس قداماعه دول حى مدك

الف مايدبه ره. ولكن خايف على عيشى وزيائىنى .

حامل ايه .

الفصل الثاني

يرفع الستار عن مدخل الأوتيل والفلاحون يغنون ويرقصون.

- أحدهم** : (بعد اللحن وخروج الراقصات) هس. وادي عم صفر افندي صاحب اللوكانده
اهه (يصفقون لدخول الفندق وهو حامل بيده جريدة) ليحيا حزب شوال بيه
- الجميع** : ليحيا حزب شوال بيه
- صفر** : كل دا كويس يا اخواني. وانا في مقدمة حزب الشوالين زي مانتهم راسيين بس
ارجوكم تلاحظوا نقطه واحده
- الجميع** : إيه يا عم صفر
- صفر** : بقى أنا سمحت لكم بالاجتماع هنا في محلي امبارح والنهارده. ولكن ما
تنسوش إن دا شيء لو استمر ربما يضرني في لوكاندي
- الجميع** : لك حق
- صفر** : ثم من جهه تانيه الخواجه حجاراكيس شريكي في اللوكانده دي. بيزعل كتير
من اجتماعنا هنا. فعليه ارجوكم تتفضلوا من غير مطرود. وقولوا معايا باعلا
صوتكم جميعا ليحيا شوال بيه
- الجميع** : ليحيا شوال بيه (يخرجون مصفقين)
- صفر** : أف. سبحان من صرفهم. الغريبه إني متحمس قد الجماعه دول يجي ميت ألف
مليون مره. ولكن خايف على عيشي وزبايني. حاعمل إيه (يفتح الجريدة) آه.
أما نشوف الرئيس بتاعنا بيقول إيه في الخازوق بتاعه بتاع النهارده (يجلس)
- الخواجه** : (داخلاً) فري صفر افندي
- صفر** : جرى إيه يا خواجه حجاراكس. موش تسيبني شويه أما اقرا الجرنال
- الخواجه** : يا خبيبي بزياده سياسه خرقت قلبي
- صفر** : (بحدّة) سبحان الله. طيب يا أخي شريكي في لوكاندي آمنة. وعايذ تكون شريكي
في مبادئي وحريرتي كمان
- الخواجه** : خريتك إيه فري. أنا بدي افهم. حضرتك فاتح أوتيل. والا فاتح برلمان
- صفر** : أهه الزبون اللي يعجبه على كده أهلاً وسهلاً. والي ما يعجبوش على كيفه
- الخواجه** : أخ يا ناري. أهه طول النهار بيستنى كده والخازوق في إيده
- صفر** : أيوه. يعني أنا مالقبتيلش شريك يشاركني. غير الشريك البكلاه ده



- الخواجه** : إخرس. بكالاه في عينك. أنا احسن من حداشر زيك إنت. راجل قبيح ما تختشيش
- صفر** : طيب امشي بقى روح من وشي. روح لاخلې نهارك اسود النهارده (يكون رمى الجريدة على الكرسي)
- العمدة** : (داخلًا بشنطته) جرى إيه خبر إيه حصل إيه
- صفر** : آه. رمضان بيه. لا مؤاخذه يا جناب العمدة
- الخواجه** : بردون أبو حويجة بيه (يأخذ الشنطة من يده)
- العمدة** : بقى موش عيب عليكم يا جماعه. لما اجي أنا حويجة كلي بشنطتي لحد هنا
- صفر** : ماعلش تحب جنابك تنزل في انهبي أوده من دول نمرة ١ والا نمرة ٢ والا نمرة ٣
- العمدة** : لا لا خليني في النمره دي احسن. أنا واحد على نمرة واحد
- الخواجه** : حاضر يا بيه (يدخل الشنطة في غرفة نمرة ١)
- صفر** : أهلاً وسهلاً. حضرتك اظن جاي من مصر. وجيت امتي امال
- العمدة** : (جالسًا على الجريدة) جيت امبارح بس كنت وصلت لحد البلد بلدنا. وبعدين جيت على هنا النهارده. علشان مستنظر جماعه جاين لي من مصر. إلا إنت تابع لانهي حزب هنا يا صفر افندي
- صفر** : لحزب شوال بيه ولي الشرف
- العمدة** : يا نهار اسود ياولاد طب والله لولا إني مستنظر الجماعه دول اللي جاين لي من مصر. ومواعدهم هنا. ما كنت اعتب لوكاندتك دي. بقى طول مدة حياتي
- صفر** : ما تأخذنيش يا بيه. دي مسألة مبادئ
- العمدة** : (ملتفتًا) يا خبر جورنال إيه ده اللي أنا كنت قاعد عليه (يتناول الجريدة)
- صفر** : (أخذًا الجريدة) دا الخازوق
- العمدة** : إخص (يرميه) الله يخيبه ويخيب صاحبه. الغايه تعال حط لي كرسي في البلكونه دي. وبعدين ابعت لي جرسون من جرسينك. يجيب لي بورسبون فول وزيت (يخرج)
- صفر** : حاضر يا افندم. إلا بورسبون فول وزيت دي كمان (يخرج ضاحكًا)
- زبيدة** : (داخلة بشنطة) آه. اسمع هنا يا جرسون. هي دي لوكاندة المملوك
- الخواجه** : أيوه يا هانم (يأخذ الشنطة ويحتفها^[١] يمينا)
- زبيدة** : طيب شوف لي أوده تكون طراوه وعالخلا احسن أنا تعبانه من دوشة القطر وبدي استريح شويه

[١] معناها: يلقيها.



- الخواجه** : حاضر. بس أما نجيب الدفتر ونيجي. بردون (يخرج)
- زبيدة** : أف. أما تعبانه تعب (تجلس) بس اياك على الله انتهى من مسألة الكام فدان
دول اللي عايزه اشترهم. وارجع لمصر قبل ما يكون جوزي جه من اسكندريه
وياخذ خبر
- رجب** : (داخلاً) يا جرسون
- زبيدة** : يا خبر. إنت حضرتك جاي ورايا
- رجب** : جاي قدامك اهه
- زبيدة** : شيء غريب إيه اللي جابك هنا في طنطا. ثم متين عرفت إني نازله في الأوتيل ده
- رجب** : قلب المؤمن يا هانم (يضع الشنطه فوق الطواله)
- زبيدة** : أما شيء بارد صحيح
- رجب** : أنا والله جيت علشان اعابن الكام فدان اللي بدك تشتريهم لأن موش من
الانسانيه أبداً. إن واحد زي يشوف واحده هنومه زيك. هنا لوحدها في الأرياف
- زبيدة** : لا أشكرك. الأرض عاينتها وخلص. اتفضل إنت شوف لك لوكانده تانيه من غير
مطرود
- رجب** : (يرد) حاضر
- زبيدة** : بقى كويس كده يا محرم بيه
- رجب** : محرم بيه (متذكراً) آه (ضاحكاً) أيوه.. كويس على إيه يا هانم
- زبيدة** : يعني لو حد شافك بتتكلم معايا دلوقت من جرسونات اللوكانده دي حا يقولوا
إيه
- رجب** : يقولوا إيه. يقولوا ابن عمها ابن خالها. اخوها. جوزها..
- زبيدة** : إلا جوزها دي كمان
- الخواجه** : (داخلاً بدفتر) آه. حضرت البيه دي جوزك يا هانم
- زبيدة** : هه
- رجب** : أيوه يا سيدي جوزها ودي عايزه سؤال. إنت مافيش في عينك نظر يا أخي. أمال
لوكوندجي إيه. جوزها. آه جوزها
- الخواجه** : طيب. حاضر حاضر
- رجب** : قول عندك. محرم بيه ذهني والست حرمة من مصر
- الخواجه** : (يكتب) مخرم بيه ذهني والست خرمة من مصر مرسي يا بيه (يقفل الدفتر)
- رجب** : فين احسن أوده عندك بقى يا حظ. دي؟ (مشيراً على نمرة ١)



- الخواجه** : لا دي فيها واخذ عمده. الاحسن يمسك نمرة ٢ دي
- رجب** : طيب امسكها ياللا
- الخواجه** : أبوه بس لما ندخل الشنطه. مخرم بيه ذهني والست خرمة (ياخذ الشنطتان ويدخل غرفة نمرة ٢)
- زبيدة** : إلا محرم بيه ذهني والست حرمة دي. آدحنا بقينا اجواز كده بالزور
- رجب** : دا شيء بسيط جداً يا مراتي
- زبيدة** : إيه بتقول إيه
- رجب** : ما باقولش شالله يا سيد (يخرج الخواجه من الغرفة متجهًا لليمين)
- زبيدة** : يعني وإيه الرأي معاك دلوقت
- رجب** : الرأي. تصدقي يا هانم إني أنا ابتديت اتضايق. لكونك سايقه التقل على قوي
- زبيدة** : وانت تصدق يا محرم بيه. إني أنا ابتديت اتندم على كوني كلمتك النهارده في المحطه
- رجب** : نعم
- زبيدة** : ما نعمش ولا حاجه. ياللا كمان مره. شوف لك لوكانده تانيه احسن اسيب لك البلد دي وتني مسافره حالاً
- رجب** : هه (يهرش في رأسه)
- زبيدة** : ماتهرشي. حا تنزل والا انده لك الجرسون ينزلك
- رجب** : وبعدين بقى
- زبيدة** : (مادة يدها لمصافحته) ياللا. أورقوار. إبقى قابلني في مصر
- رجب** : طيب.. أورقوار (يقبل يدها فيدخل العمدة)
- العمدة** : يا بوي (يتقدم بينهما دون أن يراه)
- رجب** : أورقوار يا مراتي
- العمدة** : يه. آدي شولايه هانم (تذهب زبيدة لغرفتها ويتبعها رجب لغاية الباب)
- شولايه هانم تبقى مراته
- رجب** : طيب. أنا راجع بعدين يا مراتي
- العمدة** : آه. والله وقعت في إيدي يا بتاع الخازوق يابن ألوطة
- رجب** : (ملتفتًا) مين ده. مين حضرتك
- العمدة** : حضرتي أنا سالم أبو حويجة الدنف البرماوي اللي غايظ الكل
- رجب** : (متهكمًا) وأزاي بنتك حويجة



- العمدة** : إخرس قليل الحيا ما تختشيش. موش بزياده قلة حياك وشتيمتك في الراجل
رجب بيه فهمي سيدك
- رجب** : رجب بيه فهمي
- العمدة** : أيوه رجب بيه فهمي. دانت لازم امك داعيه لك اللي رحنت لك امبارح ولا
لقيتكش في بيتكم
- رجب** : في بيت مين يا جدع
- العمدة** : الغاية. جدع ماجدعش. أنا حالف يمين قسم بالله العظيم إني أول مانضر
خلقتك (بتناول الجريدة) لازم ابرم الخازوق بتاعك ده وارشفه في عينك
- رجب** : آه يا وقح يا قليل الحيا (يمسح وجهه)
- زبيدة** : (خارجة من غرفتها) الله إيه ده. فيه إيه (تري العمدة) يا خبر العمدة بتاع
مصر
- رجب** : (لزبيدة) الراجل ده لازم مجنون. لازم اروح ابلغ عنه حالاً واوديه في داهيه
- العمدة** : لا مؤاخذه يا شولايه هانم
- رجب**
- وزبيدة** : هه
- العمدة** : أهه كل يوم من دا يا شوال بيه (يتجه لغرفته) أنا اوريك الخازوق يطلع منين
(يدخل الغرفة)
- رجب** : (لزبيدة) بيقول إيه الراجل ده
- زبيدة** : سيبك منه ما تاخدش بالك
- رجب** : ماخدش بالي ازاي. إيه المناسبه في كونه بيقول لنا شوال بيه وشولايه هانم.
وخازوق وماخازوقش
- زبيدة** : لا دا بس علشان..
- رجب** : علشان إيه. أنا موش فاهم. فهميني إيه الحكايه
- زبيدة** : الحكايه يا محرم بيه إن العمدة ده. تحب اقول لك كده بكل صراحه
- رجب** : أيوه قولي. إيه بس
- زبيدة** : في الحقيقه يا عزيزي. أنا جوزي ما اسموش شاكر بيه زي ما قلت لك. فهمت
بقي؟
- رجب** : الله. امال اسمه إيه
- زبيدة** : اسمه شوال بيه



- رجب : شوال بيه صاحب جرنال الخازوق
- زبيدة : أيوه. والراجل الفلاح ده كان شافني في مصر. وبعدين دلوقت لما شافني وبك هنا. افتكرك جوزي
- رجب : (ضحكًا) هو (لزبيدة بفرح) آه يا روحي...
- زبيدة : لا لا ارجع. دلوقت ما دام المسألة اتلخفنت. مافيش قدامي بقى غير كوني آخذ شنطتي واول قطر وعلى طول على مصر
- رجب : الله الله. بس اسمعي يا روحي. شولايه هانم (عائدًا) يا خساره لو كنت عارف إنها مراته. الغايه بقى لا ممكن المسألة تنتهى بفضيحه ياللا السلامة. دلوقت احسن شيء إني افك أنا لآخر على مصر طوالي. يا جرسون. يا جماعه ياللي هنا. ياهو. يا ناس
- الخواجه : سويتو^[١] سويتو (يدخل) عايز خاجه يا مخرم بيه
- رجب : أيوه. شوف حسابك كام. بس قوام. أحسن غيرنا فكرنا ومسافرين دلوقت حالًا
- الخواجه : جرى لهم إيه (يلتفت حوله)
- رجب : (موجهًا كلامه لغرفة زبيدة) ياللا شهلي يا روحي لا القطر يفوتنا من حق أما اشوف مواعيد القطورات (يخرج شمالًا)
- الخواجه : أنا عارف صفر افندي دي روختو في انهي داهيه
- عويس
وشلتوت
- والرخم : يادي النهار اللي زي القشطه. زقططوا وافرحوا يا وله إنت وهو. هو فين عم صفر افندي. بشرى النهارده بشرى
- الخواجه : باسم الله الحفيظ. إيه دي خريقه (يتجه لجهة الأصوات)
- عويس : (داخلًا ووراءه شلتوت والرخم) هو فين عم صفر افندي
- شلتوت : إفرح وزقطط يا خواجتنا
- الرخم : ياللا اتحزم وارقص لنا عشره يا خواجه
- الخواجه : نرقص إيه فري إنت مجنون
- صفر : (داخلًا بلهفة) إيه العبارة جرى إيه. خبر إيه
- الثلاث : تعالى إنت فين
- صفر : إيه فيه خبر مهم
- الثلاث : مهم ويس

[١] "سويتو" كلمة باليونانية معناها: حال.



- عويس : شوال بيه رئيس الحزب بتاعنا
 صفر : إيه ماله
 عويس : خد (يخرج تلغراف من جيبه) آدي التلغراف اللي باعته امبارح من اسكندريه
 لوكيل جرنال الخازوق بتاعه اللي هنا (يناوله التلغراف)
 صفر : يا ترى فيه إيه
 الثلاث : أيوه اقرا بس
 صفر : فرحت جدًّا للحصول على ميتين صوت في طنطا وسأحضر باكر بعد الظهر.
 شوال
 الثلاث : يعني النهارده حا يطب هنا
 صفر : أيوه مفهوم. حاكم شوال بيه. كان موصي سليمان افندي وكيل الجرنال بتاعه.
 بأنه مجرد ما يجمع له ميتين صوت في طنطا بيعت له تلغراف لاجل ما يجي
 هنا بنفسه
 شلتوت
 والرخم : يا سلام
 عويس : يا ترى شكله إيه
 صفر : والله علمي علمك. أهه كل رجالتنا اللي مرشحيه هنا للانتخاب ما يعرفوهش
 إلا بالاسم بس. فاحسن شيء دلوقت إننا ناخد ويانا سليمان افندي وكيل
 الخازوق. ونروح على المحطه نستقبله استقبال عظماء الرجال
 الخواجه : برضه السياسه اخيه يا ربنا اخيه اخيه
 الجميع : اكسو بره. اكسو بره. اكسو بره (يخرج)
 هريدي : (داخلاً) خبر اسود يا اولاد. الحق يا عم صفر افندي
 الجميع : إيه جرى إيه
 هريدي : الراجل سليمان افندي وكيل الجرنال بتاع الخازوق
 صفر : ماله
 هريدي : اتخانق مع واحد من الحزب بتاع رجب بيه وخرشمه خالص وبعدين في المركز
 اتناول كمان على جناب سعادة المأمور
 الجميع : وبعدين
 هريدي : وبعدين اهم حابسينه وموش راضيين يسيبوه أبداً
 الجميع : يادي الصدفة اللي زي الكوبيه. يادي النهار السـ...



- العمدة : (بحدة) إليه الخبر إيه يا صفر افندي
- صفر : (هامسًا للفلاحين) هس احسن دا من حزب المسايسن (يكحون)
- العمدة : فهمني هنا. إنت فاتحها لوكنده نوم. والا نقابة عصبجيه
- صفر : لا بس احنا فرحانين شويه النهارده يا بيه
- الجميع : فرحانين وبس
- العمدة : يه. وإيه سبب الفرحان بتاعكم ده
- عويس : ريسنا شوال بيه
- صفر : (للعمدة) أما حا يعملوا له حتة دين زفه النهارده يا رمضان بيه. حا يلففوه
- البلد بالمزيكه من أولها لآخرها
- العمدة : هم. أتاييه كان هنا النهارده
- صفر : مين هو اللي كان هنا
- العمدة : شوال بيه بتاعكم
- الجميع : شوال بيه هنا
- العمدة : أهه كان مرزي هو ومراته في الأوده اللي قبالي دي
- صفر : إزاي الكلام ده. دا الخواجه حجارا كيس بيقول لي إن اللي نزل في نمرة ٢ واحد اسمه محرم بيه والسبب حرمه من مصر
- العمدة : هم. يا راجل دا مكلمني دلوقت اهه بس. وان كنت عايز. اسأله كده. قل له أبو حويجة عمل فيك إيه
- عويس : يادي النهار الاسوح يا ولاد. يكونش جاي مستخفي
- صفر : لازم كتيمي كده علشان يجس حالة الانتخاب في بلدنا
- الجميع : أما راجل واعى صحيح
- العمدة : القصد بلاش هيصان بقى. ألا أنا كابس عليّ النوم. وبدي انعس. آه (يتجه متثائبًا إلى غرفته)
- صفر : (للفلاحين) طيب ياللا امال مستنين إيه. روحوا زينوا البلد قوام حالًا. ياللا طيروا
- عويس : أبوه. أنا حالم رجالتنا كلتهم
- شلتوت : وانا الطبل والمزمار
- الرخم : وأنا عليّ العربيات والتعاليق
- هريدي : ونا ابو راييه والآلاتيه (يخرج)



- العمدة** : وبعدين بقى
- رجب** : (داخلًا بلهفة متجهًا لغرفة عمرة ٢)
- العمدة** : آه. اهه شوال بيه اهه. آنست يا بتاع الخازوق (يدخل غرفته)
- الجميع** : حضرته (يحيونه بإجلال)
- صفر** : ليحيا شوال بيه (مشيرًا على رجب)
- الجميع** : ليحيا شوال بيه
- رجب** : (على حدة) خبر اسود
- صفر** : (لرجب باحترام) أنا يا افندم محسوبك صفر عبد الجليل. صاحب لوكندة المملوك دي. آدحنا بقينا جامعين لك ميتين صوت. ضد خصمك الخنزير ده. اللي اسمه رجب بيه فهمي
- رجب** : الخنزير؟
- عويس** : طيب قسمًا بالذات العليه. إذا الراجل رجب بيه ده عتب البلد دي. نجيب لك خبره
- الجميع** : أيوه لازم نعدمه
- رجب** : إخص. أمال أما الحق افك (يظهر ارتبأكه)
- أصوات** : (من الداخل) ليحيا شوال بيه. ليحيا شوال بيه
- رجب** : إرمي. إيه دول كمان (تدخل الفلاحون)
- الجميع** : ليحيا رئيسنا. ليحيا ريسنا
- صفر** : يكون في معلومك ياسي شوال بيه. إن احنا هنا كلنا رجالتك احنا العساكر. وانت القائد الأعظم
- رجب** : (لنفسه) يادي الوقعه السوده (يسرع الفلاحون إليه ويقبلون يديه ويملسون عليه)
- صفر** : (خطيبًا) يا إخواني. يا حزب الشوالين. إحملوا هذا الزعيم على أعناقكم. شيلوه على رقابكم. طوفوا به جميع انحاء البلد. قدام كل شيخ أو حرمه أو ولد...
- الجميع** : أيوه امال. أيوه أيوه (يسرعون إليه ليحملوه)
- رجب** : لا لا ارجع. موش عايز. موش عايز
- الجميع** : (في نفس واحد) يستحيل يستحيل (يحمله أحدهم على أكتافه)
- رجب** : (صائحًا) يا ناس موش عايز. ياهو (يمتنع)
- الجميع** : ليحيا البيه. ليحيا البيه. ليحيا البيه. إلخ (يخرجون ما عدا صفر)



- العمدة** : (داخلاً بحدّة) وبعدين وياكو يا جماعه إنتو
- صفر** : (بلهجة المنتصر) صح النوم يا جناب العمدة. دلوقت حالاً نبعت تلغراف لجميع الجرايد في مصر. علشان ينشروا خبر استقبال شوال بيه في عصمته مديرية الغربية (خارجاً) ليحيا شوال بيه
- العمدة** : غور جاك بلا منك له. أخ يا ناري. إمتى بس يجي لنا رجب بيه بتاعنا احنا كمان. إلا الساعه بقت كام يابو حويجة (ينظر للساعة)
- زبيدة** : (خارجة من غرفة نمرة ٢) إيه الزيته دي كلها ياختي. شوال بيه إيه دالي كانوا بيهتفوا له ده. ما داهيه لا يكون جوزي ومرشح نفسه هنا لانتخابه (ملتفتة حولها)
- العمدة** : (ملتفتاً) ديهدني إنت بتدوري على مين يا هانم. على جوزك
- زبيدة** : هه
- العمدة** : أهم خدوه دلوقت علشان يزفوه
- زبيدة** : يزفوه
- العمدة** : أيوه. حاكم البلد دي بعيد عنك. فيها حزب مرشح جوزك شوال بيه خيري للانتخاب
- زبيدة** : (بخوف) شوال بيه خيري بتقول. هنا في البلد فيه حزب بتاع شوال بيه خيري
- العمدة** : أيوه باقول لك. وزمان ما بعثوا لكل الجرايد اللي في مصر
- زبيدة** : آه يا مصيبيتي ياني (تخرج)
- العمدة** : خفيفه شولايه هانم دي وزرايينها طالعه كده (للداخل) أدوب أنا في زرايينك وزرايين اللي خلفك
- الخواجه** : (داخلاً بشنط) إفضلوا من هنا يا ستات (تدخل الحما وعزيزة)
- الحما** : (داخلة) يا ترى رمضان بيه جه والا...
- العمدة** : (ملتفتاً) أهلاً وسهلاً. يا ميت مرحب ومرحب. داتاي الغربية منوره
- عزيزة** : الله ينور عليك
- الحما** : تصدق يا رمضان بيه إن أول ما وصلنا التلغراف بتاعك رحنا لافعين شنتطنا وتتنا جاين على طول
- العمدة** : يا سلام سلم. اجيب لكو إيه. قهوه. كازوزه. كوارع
- الحما** : لا لا لأ
- العمدة** : لأ أزاي. دانئو تستاهلوا الدبح



- الحما : مرسي
- عزيزة : وحجرت لنا أوده ليّ أنا ونينه
- الخواجه : أهه غره تلاته دي فاضي
- العمدة : طيب احجز لهم مَهره ٣ يا خواجه. وخليّ كل طلباتهم على كيسي
- الخواجه : خاضر (يدخل بالشنط في غرفة مَهره ٣ ثم يخرج بعد لحظة)
- العمدة : لكن احنا موش في كده. طمنوني. فين رجب بيه. إلاّ احنا هنا دلوقت زي الجيش
اللي بلا جن نار
- الحما : والله مع الاسف. إحنا نفسنا ماحناش عارفين هو فانهي بلد دلوقت
- العمدة : إزاي الكلام ده
- عزيزة : لازم يكون دابر يخطب المسكين. ومشحطط نفسه من بلد لبلد يا كبدي
- العمدة : يا خساره ياولاد. وإيه العمل دلوقت
- الحما : لا ما تياسش يا عزيزي. أنا بعت له جوابات وتلغرافات في كل بنادر ومديريات
الوجه البحري
- العمدة : بس اياك على الله يجي والمسأله في حموها
- الحما : على كل حال. إذا كان فيه هنا دلوقت أي شيء مهم. أنا احل محل جوز بنتي.
واخطب بالنيابه عنه في وسط المنتخبين بتوعه
- العمدة : أيوه ما يجيبها إلا حمواتها. أهى دي اللي صحيح تبقى أول خطوه في نهضة
مصر يا هانم. موش أبو الهول يتحرك. الحموات تتحرك
- الحما : (بعظمة) أي نعم تتحرك
- عزيزة : لكن على كده بلدكم دلوقت حزبين
- العمدة : حزبين وبس. ياخي قولي جيشين. قولي دولتين. بس أنا ياما كان خاطري إن
رجب بيه يكون هنا النهارده
- الحما : إيشمعنى النهارده يعني
- العمدة : علشان الراجل شوال بيه بتاع حزب المليسين
- الحما
- وعزيزة : ماله
- العمدة : أهه طب هنا النهارده بس. لكن أنا وضبته لكم توضحيه مكن. يا دوب جاي
يفتح بقه ويتفلسف معايا. وعنهما ورحت بارم الجرنال بتاعه ورشقتة في عينه



- الحما
وعزيزة : براقو عليك
- العمدة : بس المهم دلوقت إننا مانضيعش وقتنا في قال وقلنا. لأن شوال بيه بتاعهم
خدوه دلوقت يزفوه وحا يفوتوا زفته من شارع البحر
- الحما : يا خبر
- العمدة : فاحنا لاجل ما نفرسهم. ياللا بنا نلم زفتنا احنا كمان. ونفوتها قصادهم من
شارع المحطه
- الحما : أحسن فكره. ياللا بنا
- محرم : (داخلًا) هيه يا جماعه. لقيتوا أوده والا...
- العمدة : أهلاً وسهلاً حضرة السكرتير. إزيك سلامات إيش حالك
- محرم : وحشتنا طيبون يابو حويجة
- الحما : دلوقت خلينا في المهم يا جماعه. ياللا بنا حالًا على ميدان الحرب والفخار.
- أحسن أنا باغلي وقاعده على نار
- العمدة : أهه كده
- الحما : (موجهه كلامها للداخل) أيها الناخبون. وأنتم أيها الناخبون. الوطن (...)^[1] وانتم
حُماته. فإذا غاب عنكم رجلكم فأمامكم حماته. إذا غاب عنكم رجلكم الذي
يمثلكم ويناديكم. فأنتم أولاده المخلصون وبرضه البركه فيكم
- الجميع : براقو (يخرجون مصفقين على أثر الحما من اليمين)
- محرم : (باقياً وحده) أف. حقه دلوقت حا تبقى لهاليهيا للجو.. وقال كل دا
وبسلامته رجب بيه. مين عارف هايبص فانهي حته دلوقت. مع مرآة سي
شاكِر بيه بتاعته دي
- رجب : (داخلًا من الشمال بحذر) أيوه ماحدش حصلني
- محرم : يا خبر إنت هنا
- رجب : محرم. خير اسود. تعالي قل لي ايش جابك هنا قل لي. قوام اتكلم
- محرم : اللي جابني هنا بسلامتهم حماتك ومراتك
- رجب : (واثبًا) ازاي هم هنا
- محرم : غريبه. ما وصلكش جوابات والا تلغرافات منهم

[1] كلمة غير واضحة بالنص.

- وحذفت بتصريح من وزارة الداخلية أن ذاك كما هو مبين في الصورة صفحة ١٨.



- رجب :** جوابات إيه وتلغرافات إيه. إنت بتهزر. قل لي صحيح. مراتي وحماتي هنا. خيلنا في الجد وحياة ابوك
- محرم :** عجيبه. باقول لك هنا. مانتش عارف علشان إيه
- رجب :** لأ. علشان إيه
- محرم :** علشان الحزب بتاعك اللي هنا في طنطا. الجماعه اللي مرشحينا للانتخاب
- رجب :** للانتخاب. أنا لي حزب هنا في البلد دي. ومرشحي للانتخاب
- محرم :** أيوه يا سيدي. بس طول بالك. مانا لآخر زيك ماكنتش عارف. وبعدين بسلامتها حماتك رستني على كل شيء
- رجب :** رستك على إيه بس. أخ ياني ياني ياني
- محرم :** أصل العبارة يا سيدي إن فيه واحد عمدته اسمه أبو حويجة كان مكون حزب هنا ضد الحزب بتاع شوال بيه. وبعدين زي ما تقول حب إنه يرأسك عالجزب ده. ويخدمك من غير ما تعرف. لعلمه بأنك عدو شوال بيه الألد
- رجب :** يا وعدي يا وعدي. وحماتي عندها خبر بكل ده
- محرم :** عندها خبر وبس. دي زمانها واقفه بتخطب في وسط المنتخبين بتوعك هي وبسلامته العمدة أبو حويجة
- رجب :** آه ابن الكا.. وإيه العمل دلوقت قل لي إيه. أعمل إيه اسوي إيه
- محرم :** أي أي. حاسب لا تخنقني. أما غريبه دي. طب وانت خايف للدرجه دي ليه بس
- رجب :** ليه بس. علشان صاحبتنا وياي هنا
- محرم :** صاحبتنا مين مرات شاكرا بيه
- رجب :** لا موش مرأة شاكرا بيه. أتايها كانت مخبيته علي اسم جوزها الحقيقي
- محرم :** إزاي ده
- رجب :** تعرف شاكرا بيه دا يبقى مين
- محرم :** مين
- رجب :** شوال بيه
- محرم :** شوال بيه بتاعنا بتاع الخازوق
- رجب :** أيوه بتاع الخازوق
- محرم :** دا باينه هنا لآخر



- رجب : يا شيخ اتلھي
 محرم : أتلهي ازاي، باقول لك شوال بيه هنا هو ورجالته. يعني دلوقت إنهم فايتين بزفه طويله عريضه من شارع البحر
- رجب : لا يا غبي. ماهو أنا اللي كنت بانزف أنا اللي كانوا بيزفوني بيزفوني
 محرم : بيقول إيه الجدع لازم حصل له لطف
 رجب : يا مغفل يا غبي باقول لك أنا اللي كنت بانزف دلوقت علشان لما شافوني هنا ويا مرأة شوال بيه افتكروني هو
- محرم : يا خبر مقندل
 رجب : بس وعنها وراحوا شاييني شيله بيله واضطروني إني لازم اخطب فيهم
 محرم : أف. وبعدين
 رجب : وبعدين اقول لك الحق من كتر الزحمه والتسقيف والتهليل رحمت متحمس غصب عني ما تفهمش ازاي. وفضلت نازل شتيمه في نفسي وفي حزب المقايسين بتاعنا وفي الحكومه وفي البوليس...
- محرم : لا لا لا
 رجب : بس وبعدين وانا في عز التحمس بتاعي جه واحد من رجال البوليس بدّه يقبض عليّ قال بحجة إني مهيج وثوروي. فلما شفت المسأله حا تكبر بالشكل ده اخدت بعضي وتني زايفغ على هنا
- محرم : إخص. وبعدين. يا حفيظ دي المسأله بقت سلطه خالص
 رجب : سلطه وبس
 محرم : يعني عالْحساب ده. اديك إنت دلوقت بقيت رئيس حزب المقايسين ورئيس حزب المليسين في وقت واحد
- رجب : أيوه يا سيدي. شفت بقى ورطتي جنسها إيه
 محرم : ماهو إنت لآخر الحق عليك. مالمقيتتش غير البلد دي تنزل فيها
 رجب : وانا منين اعرف إن أبو حويجة الكلب دا هو اللي عمل كل دا من ورايا
 محرم : أما خازوق صحيح
 رجب : الغايه دلوقت مافيش طريقه قدامي غير كوني اشوف مرأة شوال بيه دي. واخليها تسافر حالاً على مصر (يتجه للغرفة ٢) هه. خلاص وضبت شنتتك يا روجي.. الله الأوده مافيهاش حد
- الخواجه : (داخلاً لمحرم) بردون يا بيه.. آديني لقيت لك أوده فاضي



- رجب : آه. اسمع هنا يا خواجه. ماشفتش فين الست اللي كانت ويايَ
- الخواجه : أيوه. الست مرارة خضرتك. نزلت من ربع ساعه من باب الجنينه الوراني ده
- رجب : كويس لازم بقى تكون راحت عالمحطه. أما اروح اطمئن واجي لك حالاً
(يخرج)
- محرم : طيب وانا طالع على أودتي بس ماتغييش. أما حتة دين لبخه (يخرج)
- شوال : (داخلاً بيده شنطة) إيه العبارة ياخويا. مافيش جرسونات في اللوكانده دي والا
إيه. يا اصحاب اللوكانده. يا لوكانديين
- الخواجه : (داخلاً) سويتو
- شوال : اسمع هنا يا جرسون
- الخواجه : أهلاً وسهلاً
- شوال : موش دي لوكنده الملوك اللي صاحبها اسمه صفر افندي عبد الجليل
- الخواجه : أيوه يا بيه وانا شريكه
- شوال : طيب روح انده له هنا حالاً. قل له كلم شوال بيه. ياللا طير قوام
- الخواجه : خاضر خاضر. بس..
- شوال : أما دا شي يجنن يا عالم. بقى دا الاستقبال الرسمي اللي أنا طالبه بالتلغراف. دي
المزازيك. دا الطبل. دي التعاليق. دي زفتي. دي البلد اللي لي فيها حزب طويل
عريض. وجمع لي ٢٠٠ صوت للانتخاب
- الخواجه : يا خفيظ دي لازم بيضوها
- شوال : الغايه. اديني دلوقت أوده يا خواجه. وأنا بعدين اعرف شغلتى
- الخواجه : خاضر
- شوال : (ذاهباً للغرفة مرة ٣) اسمع هنا. الأوده دي فاضيه
- الخواجه : لا. دا فيه اتنين ستات. الفامليه بتاع واخذ اسمه رجب بيه فهمي
- شوال : هه. رجب بيه هنا
- الخواجه : لا بس الفامليه بتاعه. لكن هو لازم يجي النهارده ضروري. علشان فيه هنا ناس
عايزين يخطوا هو في البرلمان
- شوال : هس اخرس. برلمان في بوزك. أنا لازم اسحقه سحق هنا في البلد دى. البركه في
الخازوق بتاعي
- الخواجه : تخب خضرتك تمسك أوده فوق
- شوال : لا لا لأ. أنا حاخذ الأوده بتاعته دي كده بالدرع



- الخواجه** : لا موش ممكن يا بيه. دي محجوز علشان الفامليه بتاعه
- شوال** : هس امشي إنت موش شغلك. أهو إن كان راجل صحيح. يبقى يجي يطلعني منها. روح هات لي فرشاه نضيفه احسن كلي تراب. ياللا قوام اتلحج
- الخواجه** : إيه الراجل دي. (يدخل غرفة نمرة ٣) أنا مالي لما يجي اصحاب الأوده يبقى يصطفلوا سوا سوا (خارجًا) واخد فرشاه نضيفه للبيه (يخرج)
- العمدة** : (داخلًا) يا سيد يا بدوي. أما كان حتة دين دوشمان ياولاد أنا لسه ماشفتش جنس حرمة زي دي أبداً. دي خلت البلد كلها قائمه على رجل.. آه. اسمع هنا يا جرسون. الفرشه دي لي أنا
- الخدّام** : لا يا افندم. الخواجه ججاركيس قال لي روح اديها للبيه اللي جه دلوقت في نمرة ٣
- العمدة** : البيه اللي جه دلوقت في نمرة ٣. في نمرة ٣ دي اللي فيها حماة البيه بتاعنا ومراته. يا نهارك ابيض دا لازم هو
- الخدّام** : هو مين
- العمدة** : الرئيس بتاعنا رجب بيه. أهه جالنا سبع البريه جالنا. يا ألف مرحب ومرحب
- شوال** : (خارجًا من الغرفة نمرة ٣) فين المفرشه يا...
الخدّام : أهه يا افندم (يناوله الفرشة ويخرج)
- العمدة** : يادي النهار اللي زي القشطه. يادي النهار اللي كله ندا في ندا
- شوال** : هه. إيه دا كمان (يفرش ثيابه)
- العمدة** : (مقترّبًا) بردون يا افندم وسيد من يتقال له افندم. أنا محسوبك رمضان سام أبو حويجة الدنف من أعيان برما غريبه
- شوال** : (ناظرًا إليه برود) وأنا مالي (يستمر في فرشة ثيابه)
- العمدة** : هه. أنا اللي كنت عند سعادتك امبارح في مصر. أنا أبو حويجة اللي تعهدت باني لازم اخسف لك حزب المليسين كله. وأولهم شوال بيه ابن الدونكي ده
- شوال** : إيه إيه إيه (لنفسه)
- العمدة** : مليسين قال ومتيسين. هو فيه حزب يقدر يقف قدام حزبك إنت يا رجب بيه يا غايظ الكل
- شوال** : إخ. دا فاكرني رجب بيه
- العمدة** : ديهدي. من حق اصبر أما اضحكك. الراجل شوال بيه بتاع الخازوق قابلته لك هنا من نص ساعه دلوقت
- شوال** : إيه. شوال بيه قابلته هنا من نص ساعه بتقول



- العمدة** : أيوه. وحتى كان جايب معاه شولايه هانم
- شوال** : شولايه هانم مين
- العمدة** : مرآة شوال بيه
- شوال** : غريبه دي. طب وانت إيش عرفك بهرآة شوال بيه إنت
- العمدة** : اللي عرفني بها إني امبارح كنت في مصر. وبعدين فت على بيت اللطخ جوزها ولا لقيتوش
- شوال** : هه. وإيه كمان يا سيدي
- العمدة** : بس وبعدين بالصدفه النهارده لقيتها لك هنا مع جوزها إتما كان مستخفي قال. ومسمي روحه محرم بيه ذهني
- شوال** : محرم بيه ذهني. بقى الراجل اللي كان وياها كان مسمي روحه محرم بيه ذهني
- العمدة** : إتما عاديك. كان نازل فيها بوس هنا ابن الوطه
- شوال** : آه ابن الكا... فين هو بس محرم بيه ذهني ده. فين شولايه هانم دي. فين شوال بيه ده. اتكلم (يقبض على رقبتة)
- العمدة** : أي أي. حاسب زمارة رقبتني. يا حفيظ. دا اتاي الريسا بتوع الأحزاب دول لما يزعلوا يبقوا وحشين خالص. أما ازوغ من قدامه دلوقت لا يموتني (يخرج بحذر من الوسط)
- شوال** : ماهو لازم تقول.. هه. راح فين البقف دا كمان
- محرم** : (داخلاً) يا ترى رجب بيه عمل إيه
- شوال** : آه. اسمع هنا يا اخينا
- محرم** : مين أنا
- شوال** : أيوه. ماتعرفش هنا في الأوتيل ده. واحد مسمي روحه شوال بيه والا محرم بيه ذهني
- محرم** : محرم بيه ذهني. أنا محرم ذهني
- شوال** : إيه. إنت محرم بيه ذهني. إنت إنت
- محرم** : أيوه أنا أنا. وادي حتى علشان تصدق (يخرج محفظته) آدي الكارت بتاعي في المحفظه اهه
- شوال** : (يخطف المحفظه) وزي المحفظه دي
- محرم** : الله. إيه ده. المحفظه بتاعتي يا مسيو
- شوال** : هس اخرس محفظه في عينك (يضع المحفظه في جيبيه)



- محرم** : يا مسيو اديني محفظتي باقول لك احسن انده لك البوليس
- شوال** : وكمان بتقول بوليس. يا دون يا فلاقي. خد استلم خد استلم (يضر به)
- محرم** : آه جاي الحقوني ياهو. الحقوني يا ناس. يا بوليس (يخرج)
- شوال** : إمشي بوليس في بوزك. أهه خلي المحفظه بتاعته هنا معايا علشان ابقي استدل عليه وقت اللزوم. بس المهم عندي دلوقت. إني آخذ شنطتي واسافر على مصر حالاً
- شوال** : علشان اتظمن اشوف مراتي موجوده في البيت والا لأ. (ملتفتاً) يا خبر. إنت هنا
- رجب** : هنا قوي
- صفر**
- والفلاحين** : (من الخارج) ليحيا شوال بيه. ليحيا شوال بيه
- رجب** : سامع. سامع الهتاف يا نخ
- شوال** : هتاف مين يا غبي. دول بيهتفوا لي أنا موش لك إنت
- صفر**
- والفلاحين** : ليحيا الخازوق. ليحيا الخازوق
- شوال** : هه. صدقت بقى إنه ليّ أنا. هل فيه حد عنده خازوق غيري
- رجب** : لا يا حبيبي. أنا خازوقي اجعص من خازوقك بزمان
- شوال** : الغايه. أنا أعد دا اكبر انتصار عليك يا رجب بيه. كفايه إنه نص البلد بتهتف لي كده في الشوارع وبتقول ليحيا شوال بيه
- رجب** : يا مونشير باقول لك كمان مره. شوال بيه دا اللي بيهتفوا له أنا موش إنت
- شوال** : هه. ازاي أنا موش إنت. إنت شوال بيه
- رجب** : أيوه يا سيدي
- شوال** : الراجل باينه اتجنن. بقى يعني حضرتك عايز تخشني في شخصيتي كمان
- رجب** : يا سيدي باقول لك كمان مره. أنا شوال بيه رئيس حزب الملميسين. سلامة عقلك يا رجب بيه
- شوال** : يا خبر. الراجل ده حا يخليني سرايه
- صفر** : (داخلاً) أف. يا حفيظ
- رجب** : (لصفر) آه. تعالي اسمع هنا يا صاحب الأوتيل
- صفر** : أفندم
- رجب** : قول لحضرة الافندي أنا مين
- صفر** : يا سلام. سعادتك شوال بيه أشهر من نار على علم



- شوال : (واثبًا) إليه
- رجب : قل له يا سيدي قل له. والتهاتف الي بره دا كله لمين
- صفر : لسعادتك يا شوال بيه
- رجب : قل له
- شوال : الله. أمال أنا مين ياخويا
- رجب : حضرتك رجب بيه يا أخي
- صفر : رئيس حزب المسايسين
- رجب : لأ. رئيس حزب المتيسين (يضحكان)
- شوال : يا حفيظ أنا قربت اتلحس. أحسن شيء إني اسافر من هنا حاليًا بلا انتخاب بلا دياولو. لا لا لا لا (يدخل غرفة هرة ٣)
- صفر : وانا احسن شيء اسك عليه هنا لحد ما ندغه علقه على دين أيهان زوقي (يسك)
- رجب : أهه كده
- الفلاحون : (من الداخل) تعالوا بنا من هنا يا عم عويس. إلحق ياسي شوال بيه. إلحق اهرب
- رجب : أهرب ليه
- عويس : الجماعه البوليس جايبين على هنا علشان يقبضوا عليك دلوقت
- رجب : عليّ أنا
- صفر : عليه هوّ
- عويس : (لرجب) علشان الافندي الي حضرتك ضربته قلم دلوقت. أتأبيه كان درغام افندي مأمور المركز
- رجب : يا خير
- الجميع : ياللا الحق اهرب زوغ
- رجب : لا يستحيل. كله كوم والهرب كوم. أنا بصفتي هنا رئيس حزب لازم احتمل فيه كل مصيبه. لازم احتفظ على مبادئ فيه حتى النهايه. ويا بخت كل من يتبهدل وضحي في سبيل خدمة بلاده^[١].

ستار

[١] حذف: ويا بخت كل من يتبهدل وضحي في سبيل خدمة بلاده.
- وحذفت بتصريح من وزارة الداخلية أن ذاك كما هو مبين في الصورة صفحة ١٨.



الفضل الثالث

(ربح السارة مريم التي رزقه ربه من اصحاب الالهة الساقط
 وبعضهم منه حارة الانتخاب)
 (وانه بعد اللحد) قطعه قطع الدم وهو في . الراحل جسد من حوري
 ام احمد
 باليد الناكس وقف حاله . وبعين قلت في عقل بالي يا الله
 يايت ما يجيبه من سوفي لك قد من هشا والوجه هشا . والنزل
 استغنى لهو عيب ان ام احمد تستغل . اذني ليدونه (ربح مريم القديسة)
 طول بالاك يا لعدى يا سترال . عابرة مبه عفرتك . سيدة شوال بين
 لدا هوس هشا سافر . لدا ما ندرش عجب الحق . موقليم اية ده
 كل ما حط السما على ودني يا غير (رزي السماء)

زبيده
 ام احمد - يا نالتي ام احمد
 ام احمد - يو . القلا حركات هانم . الحمد لله عم الدم ازيك
 زبيده
 ام احمد - طميتي . سيدك له ما جاش من الله
 ام احمد - ليا ستي . حتى كان فيه واحد يسأل عليه رلوقت في الامون
 وبعين قلت له سافر
 زبيده
 الحمد لله اللى ما جاسه في عيالي ودرى الى سافر . بس وصياة
 ابوك يعنى يا ام احمد . في عرضك اذني تفكلى كدام جوري .
 واقولى له انى كنت في طنطا . سامه
 ام احمد - يو ما ندامه . موش عيب يا ستي

الفصل الثالث

يرفع الستار عن محررين الخازوق وهم من أصحاب الجرائد الساقطه وبعضهم من سمسارة الانتخاب.

- أم أحمد : (داخلة بعد اللحن) قطيعه تقطع خدمه وحوجتها. الراجل جعلص جوزي يا كبدي التاكس وقف حاله. وبعدين قلت في عقل بالي يالا يا بت ما يجيبش منه شوفي لك خدمه من هنا والا من هنا. وانزلي اشتغلي لهو عيب إن أم أحمد تشتغل. إوعى يصدق (يضرب جرس التلفون) طول بالك يادلعدني يا سنترال. عايز مين حضرتك. سيدي شوال بيه لا ماهوش هنا مسافر. هه. لا ما نعرفش يجي إمتى. يو قطيعه إيه ده كل ما حط السماعه على وديني باغير (ترمي السماعه)
- زبيدة : هه. يا خالتي أم أحمد
- أم أحمد : يو. أهلاً وسهلاً^[1] ست هانم. الحمد لله على السلامه ازيك
- زبيدة : هه. طمئيني. سيدك لسه ماجاش من السفر
- أم أحمد : لا يا ستي. حتى كان فيه واحد ببسأل عليه دلوقت في التلفون وبعدين قلت له مسافر
- زبيدة : الحمد لله اللي ماجاش في غياي ودري إني مسافره. بس وحيه ابوك بقى يا أم أحمد. في عرضك اوعى تغلطي قدام جوزي. وتقولي له إني كنت في طنطا. سامعه
- أم أحمد : يو يا ندامه. موش عيب يا ستي
- زبيدة : أيوه. أحسن أنا كنت مخبيه عنه مسألة الكام فدان دول. اللي رايحه اشترتهم في الغريبة
- أم أحمد : لا ولا يكون عندك فكر يادلعدني. دي أم أحمد تكتم السر. يا سلام (جرس)
- زبيدة : آه. روعي شوفي مين ده
- أم أحمد : أيوه. استاسو استاسو (تخرج)
- زبيدة : دا لازم يكون جوزي. أما أنا والله بنت حلال اللي بدال ما اجي امبارح على هنا على طول. نزلت في بنها وبت عند خالتي تفيده هانم. بالشكل ده لو دري إني كنت مسافره. ابقى اقول له كنت عند خالتي واهوشه واطلع فيها

[1] تم حذفها.



- أم أحمد : (داخلة) ادلعي يا ستي
 زبيدة : إيه مين ده
 أم أحمد : فيه تلاته فلاحين بيسألوا على حضرتك. وجايين معاهم صندوق قد كده
 زبيدة : صندوق قد كده. مين دول يا ترى
 أم أحمد : والله ماعرفش. يمكن هديه جايينها لك. من هنا والا من هنا. اروح أنا أسألهم
 زبيدة : لا مافيش لزوم. إندهي لهم إنتِ هنا. أنا أسألهم أنا
 أم أحمد : طيب حاضر. تعا خش يا عم يا بتاع الصندوق إنت وهو. أيوه من هنا
 يادلعي. أهه ستي اهه
 صفر : (يدخل عويس وشلتوت والرخم حاملين صندوقاً وأمامهم صفر افندي)
 سلام عليكم
 زبيدة : وعليكم السلام. إيه الاشكال دي ياختي (يضعون الصندوق وسط المرشح)
 صفر : بقى احنا يا حضرة الست هانم. أنا وعويس وشلتوت والرخم ده أبطال الحركة
 بتاع الحزب لانتخابه في جميع أنحاء مديرية الغربية
 زبيدة : تشرفنا. إما بس من الأسف يا حضرات الأبطال. جوزي شوال بيه موش هنا
 دلوقت. مسافر
 صفر : عارفين يا هانم. هو كان معانا في طنطا وبعدين البوليس رحله النهارده الصبح
 على مصر
 زبيدة : البوليس. ليه كفى الله الشر. جرى له إيه
 عويس : إزاي. حضرتك ماعندكيش خبر إن جوزك اتقبض عليه امبارح في طنطا
 زبيدة : يا خبر زي بعضه. ليه
 صفر : السبب إنه تناول على مأمور المركز وضربه قلم. وانهم اعتبروا خطبته اللي
 خطبها امبارح خطبه مهيجه. وقبضوا عليه بصفته ثوري
 زبيدة : يادي الواقعه اللي زي بعضها
 صفر : لكن ولا تعكري دمك أبداً. إحنا انتقمنا لشوال بيه رئيسنا احسن انتقام. انتقمنا
 له من عدوه الألد رجب بيه. ودغيناه حته علقه خلته تلطميس ما يعرف
 جمعه من خميس
 زبيدة : يا خبر
 صفر : بس وبعد كده كتفناه تكتيفه همايوني. وبيتناه في الصندوق ده لحد وش
 الصبح. وبعدين خدنا أوتوموبيل وتتنا جايين على هنا



- زبيدة : إليه اللخبطة دي ياختي. بقى رجب بيه هنا دلوقت في الصندوق ده
- عويس : أيوه يا هانم. حزب المليسين كله في الصندوق ده. واهه لازم يفضل هنا زي فديه. لحد ما يطلقوا لنا سراح رئيسنا شوال بيه
- زبيدة : أما أنا زي اللي في حلم صحيح
- صفر : وادي مفتاح الصندوق اهه. اتفضلي
- شلتوت : إوعى أما افتحه
- زبيدة : (أخذة المفتاح بلهفة) لا لأ. موش دلوقت في عرضكوا. (...)^[1] كده لحد ما يجي جوزي يفتحه بأيده. لا يمكن الراجل يكون (...)^[2] الحكايه دي ويعمل لنا ثوره في البيت
- عويس : ياخي لا. داحنا تلاته صلاة النبي. كل واحد فينا زي الحيطه
- زبيدة : لالا في عرضكوا خلوه لما يجي جوزي
- صفر : أظن برضه الهانم لها حق. خليه كده لحد ما يجي شوال بيه ويتلذذ بكونه يطلعه بأيده من المصيده
- الثلاثة : برضه رأي
- صفر : طيب حيث كده امال. عن إذنك يا ست هانم. إحنا حا نوصل لحد المحافظه والا الداخليه. نشوف لنا طريقه في تخلص شوال بيه
- زبيدة : أيوه الله يستركم. روحوا شوفوا لي حكايته إيه. وتعالوا طمنوني
- صفر : ليحيا الرئيس
- الجميع : ليحيا الرئيس
- صفر : ليحيا الخازوق
- الثلاثة : ليحيا الخازوق (يخرجون)
- زبيدة : أما حقه كله كوم وعبارة حبس الراجل في الصندوق ده كوم. لكن استنى. ما داهيه لا يكون الراجل جرى له حاجه جوه وتبقى عباره (تفتح الصندوق فتظهر رأس شوال) بسم الله الرحمن الرحيم
- شوال : أنا في عرضكوا ياهو
- زبيدة : يا خبر
- شوال : أنا بتاع الخازوق
- زبيدة : إليه اللخبطة دي

[1] كلمة غير واضحة بالنص.

[2] كلمة غير واضحة بالنص.



- سؤال** : (ملتفتًا حوله) هـ. مافيش حد هنا والا إيه (واقفًا في الصندوق) آه ولامد الكلب. أما طحنوني حتة دين طحنه. أعود بالله. أف. أما الحمد لله اللي جابوني لحد هنا ولا رمونيش في وسط السكه (يخرج من الصندوق) آه يا مفاصلي يانا
- زبيدة** : (أخذه بيده) سلامتكم يا جوزي
- سؤال** : آه يا زبيدة
- زبيدة** : تعالي هنا قل لي. إيه اللي كان دخلك هنا في الصندوق ده. إزاي البوليس قبض عليك امبارح في طنطا ليه
- سؤال** : أنهي بوليس دا اللي قبض عليّ
- زبيدة** : أنا عارفه. أهم جماعه من حزبك اللي في طنطا اللي قالوا لي كده دلوقت
- سؤال** : قالوا لك إني أنا اللي اتقبض عليّ في طنطا
- زبيدة** : أيوه باقول لك
- سؤال** : استني. أما اجمع فتافيت ذاكرتي. امبارح كنت في طنطا. أيوه مضبوط. طيب وبعد كده. اللوكانده. أيوه مضبوط. نزلت في لوكنده الملوك. ثم وبعد كده. آه. قابلت هناك العمدة ده اللي.. آه
- زبيدة** : الله الله
- سؤال** : آه يا خاينه يا هلس يا فلاتيه يا...
- زبيدة** : فلاتيه
- سؤال** : تعالي قولي لي هنا. كنت بتعملي إيه حضرتك في طنطا امبارح. قولي لي. فهميني. اتكلمي
- زبيدة** : يه. إنت اتجننت يا راجل. أنا كنت في طنطا. أنا
- سؤال** : أيوه. يا منافقه يا كدابه. ناس شافوك بعينهم. وقالوا لي مع مين كنت كمان
- زبيدة** : يو سلامة عقلك يا جوزي. أنا غايته رحمت لحد خالتي في بنها وبنت ليلة امبارح وتني جايه حتى ابقى اسألها
- سؤال** : (بتهمك) أيوه عند خالتك
- زبيدة** : آه وحياتك عند خالتي. حتى بالأماره ادتني علشانك علبه مره من اللي بتحبها
- سؤال** : مره إيه. مره فاصوليه
- زبيدة** : يا سلام على أخلاقك يا شوال. بقى أنا حاكدب عليك للدرجه دي. أهه خالتي تفيده هانم عندك اهه اسألها



- سؤال** : خالتك تفيدة هانم والـ.. (يخرج المحفظة من جيبه ويخرج كارت) محرم بيه
ذهني يا هانم
- زبيدة** : يا خير ابيض
- سؤال** : آدي محفظته اهه يا حضرة الست. وادي الكارت بتاعه جواها كمان
- زبيدة** : محفظته والكروته (حده) بقى على كده كان فيه واحد في طنطا اسمه محرم
بيه ذهني صحيح
- سؤال** : آه. وادي كمان العنوان بتاعه لاجل خاطرک. محرم ذهني بشارع قصر النيل
نمره ٥٥
- زبيدة** : يا سلام. بقى صاحب المحفظة دي. هو اللي قال لك إنه كان وياني في طنطا
بتقول
- سؤال** : وکت عايزاه يقول لي كمان. طب دانا أول ما شفته نزلت فيه ضرب لما كنت
حاعدمه
- زبيدة** : يا راجل إنت اختشي ما تتهمنيش التهمه الفظيحه دي باقول لك
- سؤال** : عجبیه. بقى حا تخشى في عنني يا حرمه. أروح احضره لك واجيبه هنا يكذبك
- زبيدة** : أيوه روح هاته لي هنا يقول لي كده في وشي
- سؤال** : طيب طولي بالك. والله لاكون رايح اقلب عليه شارع قصر النيل كله لحد ما
اعتز فيه واجيبه لك هنا. أنا اوريك إن كنت أنا مغفل والا لأ.. مابقاش إلا
تخونيني أنا يا هانم. لأ ومع واحد في دائرة انتخاي كمان. الصبر طيب يا ويكه
(يخرج بلهفة)
- زبيدة** : أما عجبیه دي. لكن أنا باستغرب إيه اللي وقع محرم بيه ده في إيده. وإيه اللي
عرفه إنه جه ورايا في طنطا. وإيه اللي خلاه يضربه علقه زي ما بيقول. الغايه
دلوقت حتى لو عتر فيه وجابه وياه. برضه أنا اعرف ازاى اخش في عنيه. هي
الست مننا فيه حد يغلبها أبداً
- أم أحمد** : (داخلة بلهفة) إلحقي يادلعيدي يا ستي الحقي
- زبيدة** : إيه جرى إيه يا أم أحمد
- أم أحمد** : فيه بره تلاته عسكر وواحد افندي عابزين قال يشوفوك من كل بد
- زبيدة** : يا خبر ابيض عسكر عسكر
- أم أحمد** : أيوه. اقول لهم مافيش حد هنا
- زبيدة** : لا لا. خلّي حد منهم يجي يكلمني هنا أما اشوف عابزين إيه



- أم أحمد : حاضر. يادي الحوسه ياولاد (تخرج)
- زبيدة : إلا عسكر دي كمان. يا ساتر يا رب. إلهي يفوت النهارده على خير
- أم أحمد : (داخلة أمام الباشجاويش) تعالي خش يادلعدني (بعد دخول الشاويش تدخل
الغرفة)
- مرة ١ : (داخلًا) سلام عليكم يا هانم. حضرتك الحرمة بتاعة البيه بتاع الخازوق. شوال
بيه
- زبيدة : أيوه أنا الست بتاعة شوال بيه
- مرة ١ : أنا الباشجاويش شعبان زعلواوي الحيط
- زبيدة : تشرفنا
- مرة ١ : علشان آجي افتش هنا واجري البحث عن كل صندوق يكون حاصل فيه
شككان
- زبيدة : يا خبر زي بعضه. لكن بس يا حضرة الباشجاويش. لاحظ إن جوزي شوال بيه
موش هنا دلوقت علشان تفتش هنا في بيتي
- مرة ١ : أيوه امال في بيتي أنا
- زبيدة : لكن اظن دلوقت موش ممكن يا حضرة الشاويش
- مرة ١ : (مشيرًا على الشرايط) الباشجاويش
- زبيدة : طيب موش ممكن يا حضرة الباشجاويش. لأن جوزي موش موجود هنا دلوقت
- مرة ١ : لا. أهه موجود معانا بره اهه. بس أنا حبيت انبه عليك الأول لا يحصل عندك
عجبان والا سخسخه لما تلاقي جوزك بين اتنين شاويشيه
- زبيدة : إيه
- مرة ١ : أيوه. مانا كان في الأول بدي اعامله باللين والانسانيه يا هانم لكن بسلامته
جوزك جه يتفلسف ويسوق العوج معايا وعم يدعي إن بسلامته ماهواش
شوال بيه
- زبيدة : إيه الحكايه دي رخره كمان
- مرة ١ : أنا مالي. أهه خليه ياخذ على دماغه (ينادي للداخل) خش يا شاويش رزق إنت
وهو. هاتوا المتهم لجاي
- زبيدة : (وقد رأته رجب) يا خبر محرم بيه
- رجب : يا حضرة جناب سعادة معالي الشاويش. باقول لك كمان مره أنا موش شوال بيه
- مرة ١ : أيوه هوش يا وله هوش



- زبيدة : (برود) لا له حق يا باشجاويش. حضرته موش شوال بيه
- نمرة ١ : يَه
- رجب : هه. صدقت يا حضرة
- نمرة ١ : (لزبيدة) بقى حضرته موش جوزك شوال بيه
- زبيدة : أبدأً أبدأً دي حتى أول مره شفت فيها حضرته
- رجب : أيوه مطبوط. وأنا دي اول مره تشرفت فيها بكوني شفت فيها حضرة الهانم.
- بونجور يا هانم
- زبيدة : بونجور يا بيه
- نمرة ١ : غريبه دي يا ولاد. يكونوش الجماعة غلطوا في نطنا وظبطوا شخص تاني
- أم أحمد : (داخلة ومعها مفاتيح) إدلعي يا ستي
- زبيدة : إيه يا خالتي أم أحمد
- أم أحمد : المفاتيح دول لقيتهم في الصندوق اللي كان هنا دلوقت. بينهم المفاتيح بتوع مكتب سيدي
- نمرة ١ : (لأم أحمد) عجائب. طيب ما دام المفاتيح بتوع سيدك مستنيه إيه. ما تديهم له
- أم أحمد : أديهم له. هو فين سيدي يادلعي (متلفتة)
- رجب : (بفرح) آه. صدقت بقى يا سيدي باشجاويش
- نمرة ١ : تعالي هنا يا حرمة. ماتعرفيش مين ده
- أم أحمد : لا وحياتك يا باشجاويش
- نمرة ١ : طيب سيبي المفاتيح دول لجاي وروحي إنتِ لحالك. يالا مشي
- أم أحمد : حاضر يادلعي. أما حته دين لطخ (تخرج)
- رجب : صدقت بقى يا حضرة. إن أنا مانيش شوال بيه
- نمرة ١ : طيب هس انسد بقى وكنت ساكت م الصبح ليه
- رجب : أنا اللي كنت ساكت
- نمرة ١ : أيوه إنت. معناها بتستغفل البوليس حضرتك تفضل ساكت لحد ما يظبطوك ويجيبوك على هنا. وبعدين تقول لهم أنا موش شوال زفت
- زبيدة : الله..
- رجب : أيوه طيب داننا من امبارح وانا قاعد اهاتي واقول ياهو أنا موش شوال بيه يا ناس موش...



- مرة ١ : هس اخرس بقى لازننك. راجل هلس ما تختشيش. إنت جنس كنيتهك إيه
- رجب : أما نكته الباشجاويش دا لآخر
- مرة ١ : طيب تعالي فهمني هنا. لما إنت مانتش شوال بيه. أمال إنت مين
- رجب : أنا مين. رجب بيه فهمي
- زبيدة : بيقول إيه
- مرة ١ : إيه إيه إيه. إنت رجب بيه فهمي بتاع حزب المقايسين اللي بيقولوا عليه
- رجب : أيوه يا سيدي (لزبيدة) يعني محرم بيه ذهني
- مرة ١ : والله آنست يا بتاع الحزب
- رجب : الله يوانسك. خلاص آمنت بقى إني موش شوال بيه
- زبيدة : أظن بعد كده يا حضرة الباشجاويش. تقدرنا نتفضلوا بقى من غير مطرود
- مرة ١ : مطبوط لك حق يا هانم (لرجب) وانت يا حضرة الحزبي سبحان من عتقك من إيدي. حيث كده لازم دلوقت اطلعك معنا
- رجب : الله يخليك
- زبيدة : الحمد لله
- العمدة : (من الداخل) إوعى كده. أنا سامع صوته هنا باقول لك
- زبيدة : هه
- رجب : إيه دا كمان
- العمدة : (داخلاً) والله طيب ياسي شوال بيه يا خيري
- رجب
- وزبيدة : إتوكلنا تاني
- مرة ١ : شوال بيه خيري عم يقول
- العمدة : إصحى تصدق إني أنا حاقبلك أبداً.. أنا ندرت امبارح ندر عالسيد البدوي. إنك إن ماكنتش تبطل جرنال الخازوق بتاعك ده حافظ وراك كده لحد ما اقطع خربك
- رجب : يعني إنت وبعدين وياك
- العمدة : عيب عليك ده يا شوال بيه. إختشى عيب خلّي عندك شوية تحشم
- رجب : ياخي هلوس على كيفك خد حررتك
- زبيدة : حضرتك غلطان يا حضرة العمدة
- العمدة : أهلاً ست شولايه هانم. حاكم أنا ما اعرفش إلا الجد. يانا يا الخازوق بتاع جوزك في البلد دي



- زبيدة : (لنفسها) أنا عارفه دا طلع لنا من انهي داهيه كمان
- مرة ١ : ما شاء الله ما شاء الله (لرجب) بقى حضرتك كنت عايز تغفل الحكومه وتخليني اطلق صراحك يا راجل إنت يا قليل الزمه
- رجب : هلوس إنت لآخر خد حريتك أنا مقايس
- العمدة : ليه. لاهو حصل منه إيه
- مرة ١ : حصل إن حضرته كان مقبوض عليه في طنطا من امبارح. ودلوقت عم يدعي إنه ماهوش شوال بيه. وان اسمه رجب بيه فهمي
- العمدة : (لرجب) يا نهار ابوك اسوح
- زبيدة : يا رب ما يطب جوزي دلوقت
- العمدة : (لرجب) بقى يعني إنت تلم وصدغ للدرجه دي يا بتاع الخازوق إنت
- رجب : آه شوف بالله عليك. فيش اتلم من كده
- العمدة : إخص عليك وعلى اللي شولك. بقى يا راجل بدك كمان تختلس شخصية الراجل الطيب العظيم ده. اللي اسمه رجب بيه. الراجل اللي زي السكره
- رجب : مرسي أشكرك
- مرة ١ : حيث كده. خليك ماتتوهش من هنا يا جناب العمدة. إلا أنا يمكن احتاج لشهادتك وقت اللزوم
- العمدة : أيوه. آديني ااه تحت أمرك. بس تسمع لي بغايته نص ساعه على بال ما اوصل لبيت صاحبي رجب بيه
- مرة ١ : طيب ماعلش
- رجب : إذا لقيته هناك ابقى سلم لي عليه يا...
- العمدة : طول بالك. أهه يانا يا الخازوق بتاعك في البلد دي (يخرج)
- رجب : أما حتة دين روايه
- مرة ١ : يا سلام سلم. و قال أنا من تغفيلي كنت عايز افرج عنه قال. أهى دي من كل بد كان فيها مجلس
- رجب : إنت بالك
- زبيدة : إنما بس أرجوك يا حضرة الباش...
- مرة ١ : هس بقى بلا أمور نرنجه إنت وهو. ياللا اندهي لي هنا أم أحمد بتاعتك دي.
- زبيدة : آخذ منطق لسانها
- زبيدة : طيب حاضر. يا أم أحمد



- نمرة ١ : وانت يا شوال بيه. إن ماكنتش تقرر وتعتزف حالاً بالحقيقه حاروح مكلبشك على طول
- رجب : باقول لك أنا مقاييس يا باشجاويش. واديني باقول لك كمان مره. أنا موش شوال بيه
- زبيدة : معلوم يا حضرة الباشجاويش. حضرته موش شوال بيه. اسمع مني أنا. أما دا شيء ييجن صحيح
- نمرة ١ : (للناس) يعني إنتو شاهدين على الجوز السمّرحه دول
- أم أحمد : (داخلة) إيه بادلعي يا ستي
- نمرة ١ : آه. تعالي هنا لجاي يا حرمة
- أم أحمد : أفندم
- نمرة ١ : إنت يكون في معلوميتك. إنك لو قلت تاني مره إن الراجل ده موش سيدك شوال بيه. أحطك في حديد حالاً بالأ
- أم أحمد : يا لهوي ازاي ده
- نمرة ١ : في حديد عم اقول لك. فهمانه. مين بقى لفندي ده
- أم أحمد : دا. يادي الحوسه ياختي
- نمرة ١ : إوعى تغلطي لحسن بعيدين ابعتك على المأظه. اسمه إيه لفندي ده
- أم أحمد : (مرغمة) شوال بيه
- نمرة ١ : شوفتوا كلمة الحق طلعت لوحدها ازاي (لرجب) أهه الخدامه بتاعتك رخره عرفتك. روعي إنت لحالك بقى
- أم أحمد : إخيه. دا سرايه خالص
- رجب : (للناس) أهه بالشكل ده بتروح الأبرياء في شربة ميه
- نمرة ١ : (لرجب) هه. حضرتك لسه عندك تشبث
- رجب : لا لا بالعكس يا حضرة الباشجاويش. أنا مقاييس للنهائيه أنا شوال بيه. ورجب بيه. ومحرم بيه. وصفر بيه. وربيع وجماد وكل الي تعوزه (لزبيدة) والسلام.
- حاقول له إيه يا روعي
- نمرة ١ : إيه. يا روحها
- زبيدة : إخص
- نمرة ١ : (لرجب) يعني حضرتك كنت عم تقول دلوقت. إن دي أول مره شفت فيها الست. أمال روحها دي طلعت ازاي بقى



- رجب : خازوق
 ١ مرة : دلوقت خلاص تنورت الهيئه. ياللا يا شاويش زيدان إنت وهو. أما نجري
 التبحث في أوراق المتهم
 ٣،٢ : أيوه يا افندم
 زبيدة : لا لا بس كلمه من فضلك يا حضرة الباشجاويش. اسمح لي بكلمه واحده بيني
 وبينك. أحسن بدي اعترف بشيء مهم خالص
 ١ مرة : أيوه كده خشى في دور الاعتراف (منادياً) اسمع هنا يا شوال بيه
 رجب : (ملتفتًا) هه. أنا. لا مواخذه بس كنت ناسي اسمي
 ١ مرة : خش استنظرنى جوه في الفسحه اللي بره
 رجب : فبن هى الفسحه اللي بره دي
 زبيدة : من هنا
 ١ مرة : بقى برضه عامل لي روحك غشيم عن البيت. طيب أنا اوريك. وراه لا يرقد يا
 شاويش
 ٣،٢ مرة : أيوه يا افندم
 رجب : (خارجًا) اللهم اجعله خير يا رب
 ٣،٢ مرة : هس بلا فلسفه (يخرجون)
 ١ مرة : هه. إديني بقى منطق لسانك بند بند
 زبيدة : بقى أنا يا حضرة الباشجاويش حاصر لك بعض حاجات سرية لكن موش
 بصفتك بوليس جاى تفتش بيت رسمي. ولكن بصفتك راجل عندك إحساس
 وعواطف وشعور و...
 ١ مرة : هه هه هه. كل دا عندي. غيره
 زبيدة : بس أنا دلوقت عايزه افهمك على نقطه واحده وهي إني غلط غلطه بسيطه
 نحو جوزي
 ١ مرة : أيوه فاهم آني. يا سلام على النساء دول ياولاد يا سلام. قال يدرمغوا اجوازمهم
 درمغه للركب ويرجعوا يقولوا غلطه بسيطه قال
 زبيدة : لا لأ. المسأله موش زي مانت فاكر يا حضرة الباشجاويش. العبارة غايه ما هناك
 إني كنت اتكلم مع واحد مجرد كلام بس. ولحد دلوقت موش عارفه ازاي حصل
 الكلام. دا كأنه سحرني والا ماعرفش إيه ازاي
 ١ مرة : أيوه أيوه. راسي آني. بس من حق وطى صوتك للراجل جوزك بسمعك



- زبيدة : جوزي مين يا شيخ إنت. دا موش جوزي. ماهو هو دا الشاب اللي كلمته
وباقول لك عليه
- ١ مرة : هو ده
- زبيدة : أيوه. حاكم امبارح كان عرف إني سافرت طنطا من ورا جوزي. وبعدين جه
حصلني على هناك من غير ما اعرف. وبعدين زي ما تقول بالصدفه جوزي
طب هناك. وماعرفش شك في الجدع ده ازاي. وعنهما وضربه علقه بئِن. فكل
الي أنا خايفه منه دلوقت. إن جوزي يطب علينا هنا. ويشوف الشاب ده هنا
في بيتي
- ١ مرة : هم. واسمه إيه الجدع اللي سحرك ده
- زبيدة : أنا كنت فاكركه الأول إن اسمه محرم بيه ذهني. أتأبيه رجب بيه فهمي. وكان
سمى نفسه محرم بيه ذهني كده بس
- ١ مرة : محرم بيه ذهني
- زبيدة : أيوه
- ١ مرة : يا سلام. أما النسا دول لهم تفانين ياولاد بقى حضرتك بتستخرفي من الصبح في
الحكاية دي كلها لاجل ما تغفليني وتخليني اسيب جوزك واقع في المسئوليه
- زبيدة : يا خبر. بقى برضه بعد التصريح دا كله مانتش مصدق
- ١ مرة : إيه. إطلعي من دول يا زبيدة يا نمرجيه إنت. دانا زعلواي الي ما ينضحكش
عليّ أبداً
- زبيدة : يا شيخ أنا احلف لك بأي ميمين تحب. أعوذ بالله
- ١ مرة : هس بقى بلاش أمور تهوش. ياللا خشي اقعدي حداك جوه. لحد ما افتش
مكتب جوزك ده. وبعدين ابقى انده لك
- زبيدة : النبي يا شاويش
- ١ مرة : خشي باقول لك عما في بوزك (يدفعها)
- زبيدة : أخ يا ناري. يا مانا خايفه لا جوزي يطب علينا وهو هنا (تخرج)
- ١ مرة : الوليه بدها يطير مني الكام شريط اللي باقول عليهم يالله النجا. شوفوا
النسوان شوفوا. قال يروحوا يكلموا الرجاله ويتمحكوا فيهم. وبعد ما يقع
جوزهم قال يصعب عليهم. ما كان من الأول يا ست هانم. هيه. يا شاويش
رزق. هات المتهم من حداك أما نجري التفتيش قدامه



- مرة ٢ : (داخلاً) المهتم نام على روحه يا افندم. أهه كل كلمه والثانيه يقول أنا مقاييس زي ما تجي تجي
- مرة ١ : ماعلش بخاطره خليه تحت التحفظ (بيحث جيوبه) فبن المفاتيح اللي خدتهم دلوقت من الوليه الخدامه (يخرج جوزين كلبش) ديهدني. خد خلي الجوز الكلبش دول معاك يا شاويش رزق احسن كنت ناسيهم في جيبي
- مرة ٢ : حاضر يا افندم (ياخذهم)
- مرة ١ : (وقد اخرج المفاتيح) أيوه اهم. أما تفتيش ادراج المكتب ده اهه. بسم الله الرحمن الرحيم. إيه دول. أعداد جرائل قدمه ومقالات وإعلانات في جرنان الخازوق هه. غيره. أما نشوف الدرج ده. يا مهون هون. إيه دول كمان يا زعلواي. أوراق عديمه الأهميه. ودي إيه دي إيه إيه إيه. كشف ببيان المصاريف التي صرفت لانتخاب.. ما شاء الله ما شاء الله. على الي عايزين يدافعوا عن حقوق الأمه. الغايه كل الأوراق دي ماتهمش. خلي الكشف ده معايا هنا (يضعه في جيبيه)
- سؤال : (داخلاً) أف. ما قدرتش استدل عليه. محرم بيه ذهني ده
- مرة ١ : هه
- سؤال : يا خبر. مين اللي بينكش في أوراقي. إمشي اطلع بره يا لص يا حرامي
- مرة ١ : جاي الحقوني ياهو. يا شاويش رزق يا شاويش زيدان
- مرة ٣ : جرى إيه خبر إيه
- مرة ١ : إمسك الراجل ده كان عايز يخرشميني خالص واستعدي عليّ أثناء تأدية وظيفتي (يمسكانه)
- سؤال : إوعى سبيني يا شاويش إنت وهو
- مرة ٣، ٢ : إخرس شاويش في عين اللي خلفك
- مرة ١ : تعافر. هنا لجاي. واديني منطق لسانك. إنت مين
- سؤال : إنت اللي مين موش أنا
- مرة ١ : طيب أنا اوريك أنا مين
- سؤال : تفتشني ازاي يا راجل إنت. طيب التفتيش في الشوارع رضينا به وفي البيوت كمان
- مرة ١ : إخرس احسن الهلبك
- مرة ٢ : محفظه اهه يا افندم (...)^(١)

[١] سطر غير واضح بالنص.



سؤال
 عجايبه . انا اسمي سوال . يا قول لك
 عا
 لود يا عباد ماك . سداك رجب بيه فرهي
 سؤال
 ايه . نتو من سلطيه عثمان قجنتوني يا عالم
 العمده
 ردا خلا ايوه امال (العل) انت له كفا با جناب الكاوش
 عا
 ايوه
 سؤال
 العمده شاع طنطا
 العمده
 يا خيرات بتعمل ايه كفا يا رجب بيه
 سؤال
 عا
 تعالى . تعالى سمعني بقول ايه يا جناب العمده . قه تم ده اكم
 العمده
 اكم رجب بيه فرهي على سنة دري
 عا
 ازاي الحال يا جندي
 سؤال
 يا ناس . يا هو . يا عالم . انا موسه رجب بيه ابا يا حنيغ
 العمده
 بتقول ايه
 عا
 كسني وطني صوتك الذا صميتك جوزها كفا
 سؤال
 جوز فينه وصا عيني بيه
 عا
 هم بسوقي . اليه قالت لي فيضمه سائر . انه البيع الله سحرها
 و مراقفك اكم رجب بيه فرهي
 سؤال
 ايه . هم الله تاذ لك كره . يعني . انا . ده سيقوا انتهم .
 ايه زكسني . درجب بيه فرهي . ماشا الله



- مرة ١ : وري هنا. دول الكرايرت بتوعه دول. محرم ذهني شارع قصر النيل هه. دا لازم
بقى رفيق صاحبتنا دا اللي كان وياها في طنطا وسمى نفسه محرم بيه ذهني
- سؤال : إديني المحفظه دي من فضلك. والكروته اللي فيها دول موش بتوعي
- مرة ١ : هم. وبتعترف كمان إنهم موش بتوعك. يعني حضرتك. بقى مانتش محرم بيه
ذهني. موش كده
- سؤال : لا موش محرم ذهني. أنا شوال بيه
- مرة ١ : إيه. شوال بيه عم تقول (يضحك البوليس)
- سؤال : الله بيضحكوا على إيه دول ياخويا
- مرة ١ : بيضحكوا عالفلسفه بتاعتك. بقى يا راجل إنت موش كفايه إنك لحست من
الراجل مراته وبدك تلحس اسمه كمان
- سؤال : الله. اسم مين ومراة مين اللي لحستهم
- مرة ١ : يا بوي. إنتو كلكوا مخرجيه في البيت
- سؤال : مخرجيه ازاي
- مرة ١ : أنا عارف اسمك إيه اني
- سؤال : اسمي إيه. أنا اسمي شوال بيه باقول لك
- مرة ١ : لا يا عين امك. حضرتك رجب بيه فهمي
- سؤال : إيه. إنتو متسلطين علشان تجننوني يا عالم
- العمدة : (داخلًا) أيوه امال (لنمرة ١) إنت لسه هنا يا جناب الشاويش
- مرة ١ : أيوه
- سؤال : العمدة بتاع طنطا
- العمدة : يا خبر إنت بتعمل إيه هنا يا رجب بيه
- سؤال : هه
- مرة ١ : تعالى. تعالى سمعنى بتقول إيه يا جناب العمدة وحضرتة ده اسمه إيه
- العمدة : اسمه رجب بيه فهمي على سن ورمح
- مرة ١ : إزاي الحال يا جندي
- سؤال : يا ناس. ياهو. يا عالم. أنا موش رجب بيه أبدًا. يا حفيظ
- العمدة : بتقول إيه
- مرة ١ : هس وطى صوتك ألاً صحبتك جوزها هنا
- سؤال : جوز مين وصاحبتي مين



- مرة ١ : هم. بس بقى. البت قالت لي بعضمة لسانها. إن الجدع اللي سحرها ومرافقها
اسمه رجب بيه فهمي
- شوال : إيه. هي اللي قالت لك كده. يعني عالْحساب ده ييقوا اتنين. محرم بيه ذهني.
ورجب بيه فهمي. ما شاء الله
(...)^[١]
- رجب : دا صحيح إن الأمه اللي يمكنها تميز فضائل رجالها لا بد من كونها يوم تبلغ أوج
المجد والسعادة.

اللحن الختامي

ستار

تمت الرواية

[١] جزء مفقود من نص الرواية.



ليلة الانتخابات^[١]

وله يا حسين وانت يا حسين
واللي يجولك ارقص عشره
سقفو جوي بإيديكو الاتنين
قول له خد مني عشرتين

أدوب جوي أنا يا زكية
دي الضحكه حلوه من خشمك
ادلععي واتشخلععي
سيبك م الدنيا دي وهيص
أهي دي الجنه يا واد يا سلامة
يام العيون العسلية
بتساوي ألفين روبيه
واتخطري جوي واتدلعي
دي كلها يوم والا يومين
وادي نعيمها وهور العين

وله يا حسين وانت يا حسين
واللي يجولك إرقص عشره
سقفو جوي بإيديكو الاتنين
قول له خد مني عشرتين

تبقى البلد في هليله
إلهي تصبح إيد واحده
بالشكل ده فحي العدا
بكره حا يبقى لنا برلمان
يجددوا مجد بلادنا
ونبقى كده زي العيله
وننول مرادنا وفوق كده
وننواب فيه مخلصين
والخير على قدوم الواردين


وله يا حسين وانت يا حسين
واللي يجولك ارقص عشره
سقفو جوي بإيديكو الاتنين
قول له خد مني عشرتين

[١] لم يرد هذا اللحن ضمن كشكول الرواية بل ورد بكتاب، أنظر: فتح الله، ودرويش، وكامل، معدون، سيد درويش: ٧٦.






ملحق
المدونات الموسيقية الأصلية




① الموشحات من قصيدة الرواد
عبد الوهاب



Handwritten musical score on aged paper. The score consists of seven staves of music, followed by two empty staves. The notation includes notes, rests, and dynamic markings. The first staff begins with a treble clef and a key signature of one flat. The music is written in a style characteristic of early 20th-century manuscript notation. There are handwritten annotations in Arabic script at the top right, including the number '2' and the words 'المقام الثاني' (Maqam al-Thani). The page is numbered '٢٤' (24) in the bottom right corner.





اللهم انقذنا +

انقذنا

The image shows a handwritten musical score on ten staves. The title 'اللهم انقذنا' is written at the top right. The score begins with a treble clef, a key signature of one flat (B-flat), and a 3/4 time signature. The notation consists of rhythmic patterns of eighth and sixteenth notes, with some staves crossed out with diagonal lines. The word 'Cant' is written on the seventh staff. The score concludes with a double bar line and a sharp sign (#).







Handwritten musical score on aged paper. The score consists of ten staves of music, primarily featuring sixteenth-note patterns. At the top left, there are handwritten markings "4/2" and "5". At the top right, the word "Cello" is written and underlined, with a "2" below it. The music includes various dynamics and performance instructions such as "p", "cresc.", "rit.", and "all. 1/2". A circled "6" is present above the fourth staff. The paper has a torn edge on the left side. In the bottom right corner, the number "82" is written.

Handwritten musical score on aged paper, featuring ten staves. The notation includes a treble clef and a key signature of one flat (B-flat) on the first staff. The first two staves are marked "1.º Valt.". The sixth staff is crossed out with diagonal lines. The seventh staff is marked "c". The eighth staff is marked "v.º". The page number "9" is written in the bottom right corner.



Allegretto

5. Valtre

Allegretto

A page of handwritten musical notation on ten staves. The notation is dense, featuring many notes and stems. There are several annotations and corrections throughout the piece:

- A circled area on the fourth staff.
- A circled area on the fifth staff.
- A circled area on the sixth staff.
- A circled area on the seventh staff.
- A circled area on the eighth staff.
- A circled area on the ninth staff.
- A circled area on the tenth staff.
- A circled area on the eleventh staff.
- A circled area on the twelfth staff.
- A circled area on the thirteenth staff.
- A circled area on the fourteenth staff.
- A circled area on the fifteenth staff.
- A circled area on the sixteenth staff.
- A circled area on the seventeenth staff.
- A circled area on the eighteenth staff.
- A circled area on the nineteenth staff.
- A circled area on the twentieth staff.
- A circled area on the twenty-first staff.
- A circled area on the twenty-second staff.
- A circled area on the twenty-third staff.
- A circled area on the twenty-fourth staff.
- A circled area on the twenty-fifth staff.
- A circled area on the twenty-sixth staff.
- A circled area on the twenty-seventh staff.
- A circled area on the twenty-eighth staff.
- A circled area on the twenty-ninth staff.
- A circled area on the thirtieth staff.
- A circled area on the thirty-first staff.
- A circled area on the thirty-second staff.
- A circled area on the thirty-third staff.
- A circled area on the thirty-fourth staff.
- A circled area on the thirty-fifth staff.
- A circled area on the thirty-sixth staff.
- A circled area on the thirty-seventh staff.
- A circled area on the thirty-eighth staff.
- A circled area on the thirty-ninth staff.
- A circled area on the fortieth staff.
- A circled area on the forty-first staff.
- A circled area on the forty-second staff.
- A circled area on the forty-third staff.
- A circled area on the forty-fourth staff.
- A circled area on the forty-fifth staff.
- A circled area on the forty-sixth staff.
- A circled area on the forty-seventh staff.
- A circled area on the forty-eighth staff.
- A circled area on the forty-ninth staff.
- A circled area on the fiftieth staff.

The page is numbered "11" in the bottom right corner.



رجب:	(ضاحكاً) ديهده يا حماتي. إنتِ كاتبه مقاله في دفتر اللحمه والخضار
الحما:	أيوه حاعمل إيه. ما دام كانت مقاله حزقاني وانا في المثرو. اهه مالقيتش قدامي غير الدفتر ده. وبعدين رحت عامله فيه مسوده موقتاً
رجب:	إلا دفتر اللحمه ده (يشم الدفتر) دي طالعه مقاله زفره خالص (تضحك السيدات)
الحما:	بس بس خيلنا في الجد. اسمعوا يا ستات
رجب:	(يقرأ) أيها الرجال المستبدون. إن المرأة منا بطبيعتها وبحكم ضعفها هي دائماً في احتياج إلى الحريه وإلى.. جوز كوارع بسته صاغ
السيدات:	(باستغراب) هه (يضحكن)
الحما:	بيقول إيه ده. يا شيخ اقرا في ناحيه واحده بس
رجب:	وإلى كل ما يرفع شأنها في الهيئه الاجتماعيه. ولا تنسى أيها الرجل إن المرأه منا عندها كرامه. عندها شعور. فلعل بسته مليم
الجميع:	إيه إيه

